

全五代詩
附補遺

九





全 五 代 詩

附 補 遺

(九)

李 調 元 編

叢書集成

初編

主編者
王雲五

商務印書館發行

全五代詩卷五十二

前蜀

貫休六

故林偶作

朗吟無一事。孤坐灤江濱。
媚世非吾道。良圖有白雲。
蠹魚開卷落。啄木隔花聞。
唯寄壺中客。金丹許共分。

寄栖白大師

流浪江湖久。攀緣歲月闌。
高名當世重。好句逼人寒。
月苦蟬聲嘒。鐘清柿葉乾。
龍鍾千萬里。擬欲訪師難。

送人之渤海

國之東北角。有國每朝天。
海力浸不盡。夷風常宛然。
山藏羅刹宅。水雜巨鼃涎。
好去吳鄉子。歸來莫隔年。

寄李道士

常見高人說。猶來不偶然。
致身同槁木。話道出忘詮。
長嘯仙鐘外。眠楂海月邊。
倘修陰姤姤。一望寄余焉。

秋送夏郢歸錢塘

歸客指吳國。風帆幾日程。
新詩陶雪字。元髮有霜莖。
微月生滄海。殘濤傍石城。
從茲江島意。應續子陵名。

送僧歸翠微

祇衲一箇衲。翠微歸舊岑。不知何歲月。卽得到師心。逕遶千峰細。菴開亂木深。倘然雲外老。他日亦相尋。
懷洛下盧縉雲

一減三張價。幽居少室前。豈應貧似我。不得信經年。木落多詩稿。山枯見墨烟。何時深夜坐。共話草堂禪。
送李鏞赴舉

詩業務經綸。新皆意外新。因知登第榜。不著不平人。句得孤舟月。心飛九陌塵。明年相賀日。應到曲江濱。
寶禪師見訪

山兄心似我。岸谷亦難交。不見還相憶。來唯添寂寥。茶烟粘衲葉。雲水透蘅茆。因話流年事。斯須不可拋。
觀碁

逸格格難及。半先相遇稀。落花方滿地。一局到斜暉。褚允死不死。將軍飛已飛。今朝慙一行。無以造元微。
題一上人經閣

鳥外何須去。衣如薜亦從。但能無一事。卽是住孤峰。雨歇雲埋閣。月明霜灑松。師心多似我。所以訪師重。
早秋夜坐

微涼砧滿城。林下石床平。髮豈無端白。詩須出世清。鄰僧同樹影。砌月浸蛩聲。獨自更深坐。無人知此情。
早起

夜坐還早起。寂寥多病身。神清尋夢在。香極覺花新。樹露繁於雨。溪雲動似人。又知可處客。輒輒轉征輪。

閑步不覺遠。蕭蕭木落初。詩情拋闌闕。江影動襟裾。開北雁行出。霞西雨腳疎。金峰秋更好。乞取又何如。

晚望

曠望危橋上。微吟落照前。烟霞濃浸海。川岳闊連天。白鳥格不俗。孤雲態可憐。終期將爾輩。歸去舊江邊。

贈造微禪師院

簷蔔氣雍雍。門深聖澤重。七絲奔小蟹。五字逼雕龍。樂轉紅金鼎。茶開紫閣封。圭峰爭去得。卿相日憧憧。

南海晚望

海上聊一望。舶帆天際飛。狂蠻莫挂甲。聖主正垂衣。風惡巨魚出。山昏羣獠歸。無人知此意。吟到月騰輝。

懷南岳隱士二首

千峰映碧湘。真隱此中藏。餅不煑石喫。眉應似髮長。風樞支酒甕。鶴蝨落琴床。雖學忘機者。斯人尙未忘。

見說祝融峰。擎天勢似騰。藏千尋瀑布。出十八高僧。古路無人跡。新霞出石稜。終期將爾叟。一月中登。

懷薛尚書兼呈東陽王使君

得力未得力。高吟夏又殘。二毛非自出。萬事到詩難。蟬見木葉落。雷將雨氣寒。何妨槌琢後。更獻至公看。

送明覺大師兼寄鄮山人

去去楞伽子。春深道路長。鳥啼青嶂險。花落紫衣香。此去非餘事。還歸內道場。憑師將潦倒。一向說滎陽。

廬山尋靈紀不遇

久別稀相見。深山道益孤。葉全離大朴。君尙在新吳。鐘噉聲飄驛。山頑氣噴湖。留詩如和得。一望寄前途。

懷盧延讓

時延讓
新友第

冥搜忍飢凍。嗟爾不能休。幾歎不得力。到頭還白頭。姓名歸紫府。妻子在滄洲。又是蟬聲也。如今何處遊。

春晚訪鏡湖方干

幽居湖北濱。相訪值殘春。路遠諸峰雨。時多擲甌人。蒸花初釀酒。漁艇劣容身。莫訝頻來此。伊余亦隱淪。

秋過相思寺

見說相思寺。今來似有期。瘴鄉終有出。天意固難欺。晝雨先花島。秋雲挂戍旗。故人多在蜀。不去更何之。

和韋相公見示閑臥

刻形求得相。事事未嘗眠。霖雨方爲雨。非煙豈是烟。童收庭樹果。風曳案頭牋。仲虺專爲誥。何充雅愛禪。靜嫌山色遠。病是酒杯偏。蜩響初穿壁。蘭芽半出鵝。堂懸金粟像。相公常供養
維摩居士門枕御溝泉。旦沐雖頻握。融

帷孰敢寒。德高羣彥表。善植幾生前。修補烏皮几。深藏子敬氍。扶持千載聖。瀟灑一聲蟬。棋陣連殘月。僧

交似大顛。韓吏部重
大顛禪師常知生似幻。惟重直如弦。餅憶蓴羹美。茶思岳瀑煎。祇聞溫樹譽。堪鄙竹林賢。脫穎三

千十馨香四十年。寬平開義路。淡泞潤情田。哲后知如子。空王夙有緣。對歸香滿袖。吟次月當川。休說慙如捷。堯夫卽梵天。

壽春節進

聖運關天紀。龍飛古帝基。振搖三蜀地。聳發萬年枝。出震同中古。承乾動四夷。恩頒新命廣。淚向舊朝垂。大寶歸元識。殊祥出遠池。法天深罔測。體聖妙難知。儉德爲全德。無思契十思。丕圖非力致。英武悉天資。正直方親切。回邪豈敢窺。將排頗與牧。相得稷兼饒。鹽出符真主。麟來合大規。唐歌隨羽籥。奕葉敷依祁。寡欲情雖泰。憂民色未怡。盛如唐創業。宛勝晉朝儀。吁食宮鶯囀。宵衣禁漏遲。多於湯土地。還有禹胼胝。視物如傷日。勝殘去殺時。守文情的的。無逸戒孜孜。軒頊風重振。皇唐鼎創移。始聞呈瑞石。又報產靈芝。覆幬高緣大。包容妙在卑。兄呼春赫日。師指佛牟尼。佳氣宸居合。淳風樂府吹。急賢彰帝業。解網見天慈。粟赤千千窖。軍雄萬萬兒。八蠻須稽顙。四海仰昌期。玉釐嬪嬙擁。宮花錦繡欹。堯雲同鸞翥。漢祖太駟馳。氛祲根株盡。澆訛朕兆墜。山河方有截。野逸詔無遺。境靜消鋒鏑。田香熟稻麰。夢中逢傳說。殿上見辛毗。金鏡懸千古。彤雲起四維。盛行唐典法。再覩舜雍熙。祝壽乾文動。郊天大一隨。煌煌還宿衛。疊疊叶聲詩。飲醴和甘雨。非烟遶御帷。銀輪隨寶馬。玉沼見金龜。杳杳聞韶獲。重重降撫綏。魏徵須卻出。葛亮更何之。簡約逾前古。昇平美不疑。觸邪羊嘯嘯。鼓腹叟嘻嘻。邁五方云大。超三始見奇。錦霞連紫極。仙鳥下峨眉。謝傳還爲傳。周師又作師。納隍爲永任。從諫契無爲。子子寰瀛主。孫孫日月旗。三春嗟壽域。萬國盡虔祈。

捧日三車子，恭思八彩眉。願將七萬歲，匍匐進瑤瑤。

寄天台道友

大是清虛地，高吟到日晡。水聲金磬亂，雲片玉盤粗。仙有遺蹤在，人還得意無。石碑文不直，壁畫色多枯。冷立千年鶴，閑燒六一爐。松枝垂似物，山勢秀難圖。紫府程非遠，清溪徑不迂。馨香柏上露，皎潔水中珠。賢聖無他術，圓融只在吾。寄言桐柏子，珍重保之乎。

讀元宗幸蜀記

宋璟姚崇死，中庸遂變移。如何遊萬里，祇爲一□兒。泣濁乾坤色，飄零日月旗。火從龍闕起，淚向馬嵬垂。始憶張丞相，全師郭子儀。百官皆剽劫，九廟盡崩隳。塵撲銀輪暗，雷奔棧閣危。倖臣方賜死，野老不勝悲。時有羣叟遮道泣見於上及霑飄淪日，行宮寂寞時。人心雖未厭，天意亦難知。聖兩歸丹禁，承乾動四夷。因知納諫諍，始是太平基。

別盧使君

杜宇聲聲急，行行楚水濱。道無裨政化，行處傲孤雲。幸到膺門下，頻蒙俸粟分。詩雖曾引玉，棋數中埋軍。山好還尋去，恩深豈易云。扇風千里泰，車雨九重聞。晴霧和花氣，危檣鼓浪文。終期陶鑄日，再見信陵君。

送高九經赴舉

回也曾言志。明君則事之。中興今若此。須去更何疑。志到秋霜好。忠言劇諫奇。志列忠言。皆舊人也。陸機遊洛日。文舉

薦衡時。虎跡商山雪。雲痕岳廟碑。夫君將潦倒。一說向深知。

東西二林寺流水

水爾何如此。區區砢砢流。牆邊常

一作牆邊

瀝瀝。砌下暗

一作砌下

啾啾。味不卑於乳。聲常占得秋。崩騰成大瀑。

落托出深溝。遠歷神仙窟。高淋竹樹頭。數家春碓磑。幾處浴狷猴。共月穿峰罅。喧僧睡石樓。派通天宇闊。霑入楚江浮。爲潤知何極。無邊始自由。好歸江海裏。長負濟川舟。

劉相公見訪

千騎擁朱輪。香塵豈是塵。如何補袞客。來看衲衣人。莊叟因先覺。空王有宿因。對花無俗態。愛竹見天真。欹枕松窗迴。題牆道意新。戒師慚匪什。都講更勝詢。桃熟多紅糝。茶香有碧筍。高宗多不寐。終是夢中人。

聞赤松舒道士下世

東陽未亂前相別

地變賢人喪。瘡痍不可觀。一聞消息苦。千種破除難。陰隲那虛擲。深山近始安。元關評免角。玉器琢雞冠。傲野高難狎。融怡美不殫。冀迎新渥澤。

時太平左錄道業奏聞闕出

遽逐逝波瀾。蛻殼埋金隧。飛精駕錦鸞。傾摧千仞壁。

枯歇一株蘭。仙廟詩雖繼。苔牆篆必觀。

師善大小篆。嘗有詩題赤松子廟。

烟霞成片黯。松桂著行乾。影注溪流咽。堂局隳月

寒。寂寥遺藥犬。縹緲想瓊竿。伊昔相尋遠。留連幾盡歡。論詩花作席。炙菌葉爲盤。彭伉心相似。承禎趣一般。琴彈溪月側。棋次砌雲殘。儵忽成千古。飄零見百端。荆襄春浩浩。吳越浪漫漫。已矣紅霞子。空留白石壇。無弦亦須絕。回首一長歎。

送吏部劉相公除東川

帝念梓州民。年年戰伐頻。山川無草木。烽火沒烟塵。政亂皆因亂。安人必藉仁。皇天開白日。殷鼎輟誠臣。一日離君側。千官送渭濱。酒傾紅琥珀。馬控白麒麟。渥澤番番降。壺漿處處陳。旌幢山色溼。珂轡鳥啼新。帟幕還名儉。良醫始姓秦。軍雄城似岳。地變物含春。白必侵雙鬢。清應誠四鄰。吾皇重命相。更合是何人。夜對雪寄杜使君

片片含天意。紛紛勢莫拘。灑於諸瑞後。

時有柏樹再生。甘露頻降。

憂恐一冬無。鶴鶩聲偏密。風焦片益粗。冷牽人夢轉。清

逼瘴根徂。掃徑僧傾笠。爲詩士棄爐。橋高銀蟬竦。峰峻玉浮圖。盈尺何須問。豐年已可口。遙思郢中曲。句句出冰壺。

送盧舍人朝覲

續行無爲日。垂衣帝道亨。聖真千載聖。明必萬年明。重德須朝覲。流年不可輕。洪才傳出世。清甲得高名。

翠玉藏無映。稽松畫不成。起銜軒后勅。醉別亞夫營。燒闊荊州熟。霞新峴首晴。重重堯雨露。去去漢公卿。白髮應從白。清貧但更清。夢緣丹陛險。春傍彩衣生。旣握鍾絲筆。須調傳說羹。倘因星使出。一望問支鉉。

上馮使君山水障子

憶山歸未得。畫出亦堪憐。崩岸全隳路。荒村半有烟。筆勾岡勢轉。墨搶燒痕顛。遠浦深通海。孤峰冷劍天。柴棚坐逸士。露茗煮紅泉。繡與蓮峰競。威如劍閣牽。石門關塵鹿。氣候有神仙。茅屋書窗小。苔階滴瀑圓。松根擊石朽。桂葉蝕霜鮮。畫出欺王墨。擎將獻惠連。新詩寧妄說。舊隱實如然。願似窗中列。時聞大雅篇。

避地毘陵上王慥使君

時黃賊陷東陽。公避地於浙右。

至理至昭昭。心通卽不遙。聖威無遠近。吾道太孤標。辛苦蘇氓俗。端貞答盛朝。氣高吞海岳。貧甚似漁樵。庾亮風流澹。劉寬政事超。清須遭貴遇。隱已被誰招。栗塢修禪寺。仙香寄石橋。風雷巡稼穡。魚鳥合歌謠。視事私終殺。憂民態亦彫。道高無不及。恩甚固難消。大寇山難隔。孤城數合燒。烽烟終日起。湯沐用心焦。勇義排千陣。誅鋤擬一朝。誓盟違日月。時賊僞降。盟書終背。旌旆過寒潮。古驛江雲入。荒宮海雨飄。仙松添瘦碧。天驥減豐臙。似在陳兼衛。終爲宋與姚。已觀雲似鹿。卽報首皆梟。盡願迴清鏡。重希在此條。應憐千萬戶。禱祝向唐堯。

送崔尙書朝覲

至理契穹旻。方生甫與申。一麾歌政正。三相賀仁人。巨似盧懷慎。全如邵信臣。澄淳消宿蠹。煦愛劇陽春。
對客烟花拆。焚香渥澤新。微黃還有自。令弟相公號當公。途避賢路也。挽鄧住無因。峽水全輸潔。巫娥卻訝神。宋均顏未老。
劉寵骨應貧。大醉辭王勣。含香望紫宸。三峰初有雪。萬里正無塵。伊昔林中社。多招席上珍。終期仙掌下。
香火一相親。

和毛學士文錫舍人早春

陋巷冬將盡。東風細雜籃。解牽窗夢遠。先是澗梅諳。茶癖金鑪快。舍人有茶譜。松香玉露含。書齋山帶攔。盤饌

藥花甘。雅得琴中妙。

舍人妙於七弦。

常按臉似酣。雪消聞苦蟄。氣候似宜蠶。密勿須清甲。朝歸遶碧潭。丹心空拱

北。新作繼周南。竹杖無斑點。紗巾不著簪。大朝名益重。後進力皆覃。至理雖亡一。臣時亦說三。不知門下
客。誰上宴嬰驂。

送姚洎拾遺自江陵幕赴京

捧詔動征輪。分飛楚水濱。由來真廟器。多作伏蒲人。捨魯知非願。朝天不話貧。沙頭千騎送。島上一蟬新。
莫使身侵貴。無矜貴逼身。玉階凝正色。蘭苑漲芳塵。鑾輅方離華。東書漸似秦。流年飄儻忽。書札莫因循。
涼雨鳴紅葉。非烟閉紫宸。憑將西社意。一說向荀陳。

贈抱麻劉舍人

郡政今良吏。門風古縉紳。萬年唐社稷。一箇哭麻人。憤烈身先死。敷歎氣益貞。天平資大寶。泰矣見忠臣。得罪鍾多故。投荒豈是逋。玉塞方重澀。松古更清皺。鵬鷃寧唯白。龍多豈止荀。道孤梳有雪。恩重淚盈巾。喻蜀須憑草。成周必仗仁。三峰宵旰切。萬里渥恩新。賦鵬言無累。依劉德有鄰。風期仁祖帽。鼠訝史雲塵。禪叟知何幸。元談有宿因。雙溪逢陸海。東陽見故浙西侍郎。荊渚遇平津。江陵見吏部相公。落日愁聞笛。何人爲吐茵。生徒希

匠化。寰海仰經綸。疾愈蟬聲老。

時公在荊州閑居夏疾方可。

年豐雨滴頻。劉虬師弟子。時喜一相親。

送僧入石霜

舉世祇堪吁。空知與道俱。論心齊至聖。對鏡破凡夫。業王如雲合。頭低似箭驅。牛頭大師云。猶妄心起業。業如雲。俱合論云。入地獄人頭向下也。三清徒妄想。千載亦須臾。唯我流陽叟。深雲領蠡徒。盡騎香白象。皆握月明珠。寂寞排松榻。爛斑半雪鬚。苦侵長者論。嵐蝕祖師圖。翠巘金鐘曉。香林寶月孤。兢兢齊白趾。赫赫共洪爐。山色鋤難盡。松根踢欲無。難評傳的的。須到不區區。撩舍新羅瘦。爐烟棗櫚粗。燒畬平虎窟。分瀑入香廚。師去情何切。人間事莫拘。穿林宿古塚。踢葉揭空盂。無事終無事。令枯便令枯。他年相覓在。亦不是生蘇。

送杜使君朝覲

借寇借不得。清聲徹帝聰。坐來千里泰。歸去一囊空。遺受封疆熟。扳轅草木同。路遙山不少。江靜思無窮。花舸衝烟溼。朱衣照浪紅。援毫兩岸曉。倚枕滿旗風。道罕將人合。心難與聖通。從茲林下客。應□代天功。

全五代詩卷五十三

前蜀

貫休七

獻錢尚父

貴逼人來不自由。龍驤鳳翥勢難收。滿堂花醉三千客。一劍霜寒十四州。鼓角揭天嘉氣冷。風濤動地海山秋。東南永作金天柱。誰羨當時萬戶侯。

陳情獻蜀皇帝

河北江東處處災。唯聞全蜀勿塵埃。一餅一鉢垂垂老。千水千山得得來。秦苑幽棲多勝景。巴歛陳貢媿非才。自慙林藪龍鐘者。亦得親登郭隗臺。

大蜀皇帝潛龍日述聖德詩五首

嶽瀆殊祥日月精。入堯金鏡佐休明。衣嚴黼黻皇恩通。劍折芙蓉紫氣橫。玉甃金湯山岳峻。花藏臺榭管弦清。已聞圖上凌煙閣。寵渥穹窿玉不名。珠履三千侍玉除。宮花飄錦早鶯初。雖然周孔心相似。其奈龔黃政不如。浩浩歌謠聞禁掖。重重襦袴滿樵漁。若論朝野難難日。第一之功美有餘。

紫髯青眼代天才。韓白孫吳稍可陪。祇見赤心堯日下。豈知真氣梵天來。聽經瑞雪時時落。登塔天花步步開。盡祝莊椿同壽考。人間歲月豈能催。
丈夫助業正乾坤。麟鳳龜龍盡在門。西伯最憐耕讓畔。曹參空愛酒盈樽。心慈爲受金仙囑。髮白緣酬玉砌恩。從此于門轉高大。可憐子子與孫孫。

壽春節進大蜀皇帝五首

上元大帝降坤維。箕尾爲臣副聖期。豈比赤光盈室日。全同白象下天時。文經武緯包三古。日角龍顏遏四夷。今日降神天上會。願將天福比須彌。
異香滴露降紛紛。紫電環樞照禁門。先冠百王臨億兆。後稱十號震乾坤。羲軒之道方爲道。草木沾恩始是恩。今以諛才歌睿聽。猶如飲海妙難論。
茂祉遐宣勝事并。薰風微入舜弦清。四洲不必歸王化。一統那能計聖情。合台鼓鐘膏雨滴。峨峨宮闕瑞煙橫。西逾昆岳東連海。誰不梯山賀聖明。
積劫修來似煉金。爲皇爲帝萬靈欽。能當濁世爲清世。始見君心是佛心。九野黎民耕浩浩。百蠻朝騎日駸駸。今朝獻壽將何比。願似莊椿一萬尋。

蜀王登福感寺塔三首

天資忠孝佐金輪。香火空王有宿因。此世喜登金骨塔。前生應是育王身。封疆歲暮笙歌合。襦袴正初錦

繡新。釋子沾恩無以報。祇擎章句貢平津。
似聖悲增道不窮。憂民憂國契堯聰。兩髯有雪丹霄外。萬里無塵一望中。南照微明連蒼蒼。峨眉擁秀接崆峒。林僧歲月知何幸。還似支公見謝公。
步步層層孰可陪。相輪邊日照三台。喜歡烝庶皆相逐。惆悵鑾輿尚未迴。金鐸撼風天樂近。仙花含露瑞煙開。一年一度常如此。願見文翁百度來。

少監三首

器琢仙珪美有餘。席珍國寶比難如。銜花乳燕看調瑟。衣錦佳人侍讀書。荀氏門風龍變化。謝家庭樹玉扶疎。卽期寰海降平日。歸佐吾皇侍玉除。
益友相隨益自強。趨庭問禮日昭彰。袍新宮錦千人目。馬駿桃花一巷香。偏愛曾顏終必及。或如韓白亦無妨。八龍三虎森如也。萬古千秋瑞聖唐。
具體而微太少年。鳳毛五色帶非煙。倚天長劍看無敵。遶樹號猿已應弦。接士開襟清聖熟。分題得句落花前。卽應出將傳家法。聖澤恩波浩浩然。

到蜀與鄭中丞相遇

深隱猶爲未死灰。遠尋知己遇三台。如何麋鹿郡中出。又見鸛鷺天上來。劍閣霞粘殘雪在。錦江香甚百花開。謾期王謝來相訪。不是支公出世才。

東陽罹亂後懷王慥使君五首

昨來祇對漢諸侯。勝事消磨不自由。裂地鼓鼙軍火急。連天烽火陣雲秋。吹毛淬劍雖無數。歃血爲盟不到頭。誰爲今朝奉明主。使君司戶在隨州。

時黃巢奔許公點土勇敢萬禦押于歃血連西而渠魁詐降都將連城爲盟達約遂於戍地當不與衛睦杭守同貶中也

只報精兵過大河。東西南北殺人多。可憐白日渾如此。來似蝗蟲爭奈何。天意豈應容叛亂。人心都改太凋訛。不勝惆悵還惆悵。一曲東風月勝歌。魄懾魂飛骨亦銷。此魂此魄亦難招。黃金白玉家家盡。繡闥雕甍處處燒。驚動乾坤常黯慘。深藏山岳亦傾搖。恭聞國有英雄將。擬把何心答聖朝。不是龔黃覆育才。卽須清苦遠塵埃。無人與奏吾皇去。致亂唯因酷吏來。剝剝生靈爲事業。巧通豪讚作梯媒。令人轉憶王夫子。一片真風去不迴。

灞陵戰叟

劍剗秋水鬢梳霜。迴首胡天與恨長。官竟不封右校尉。關曾生挾左賢王。尋班超傳空垂淚。讀李陵書更斷腸。今日灞陵陵畔見。春風花霧共茫茫。

再到鍾陵作

六七年來到豫章。舊遊知己半凋傷。春風還有花千樹。往事都如夢一場。無限邱墟侵郭路。幾多臺榭浸

湖光祇應唯有西山色。依舊崔巍上寺牆。

經弟妹墳

淚不曾垂此日垂。山前弟妹塚離離。年長於吾未得力。家貧拋爾去多時。鴻衝紫塞霜中斷。蕙雜黃蒿塚上衰。恩愛苦情拋未得。不堪回首步遲遲。

別馮使君

瓦礫文章豈有媒。兩三年祇在金臺。本師頭白須歸去。太守門清願再來。皓皓玉霜孤雁遠。蕭蕭松島片帆開。從茲林下終無事。唯祇焚香祝上台。

上新定宋使君

禪坐吟行誰與同。杉松共在寂寥中。碧雲詩裏終難到。白藕花經講始終。水疊山層擎草疏。砧清月苦立霜風。十年勤苦今酬了。得句桐江識謝公。

和李判官見新榜爲兄下第

失意荆枝滴淚頻。陟岡何翅不知春。心中歧路平如砥。天上文章妙入神。休說宋風迴鶴首。卽看雷火燎龍鱗。從茲相次紅霞裏。留取方書與世人。

送羅鄴赴許昌辟

方得論心又別離。黯然江上步遲遲。不堪迴首崎嶇路。正是寒風皺錯時。美似邵超終有日。去依劉表更

何疑。前程不少南飛雁。聊寄新詩慰所思。

酬張相公見寄

周郎懷抱好知音。常愛山僧物外心。閉戶不知芳草歇。無能唯擬住山深。感通未合三生石。騷雅歡擎九轉金。但似前朝蕭與蔣。老僧風雪亦相尋。

酬周相公見贈

三界無家是出家。豈宜拊鳳觀新麻。幸生白髮逢今聖。曾夢青蓮映玉沙。境陟名山烹錦水。睡忘東白洞平茶。喜擎繡段攀金鼎。謝眺餘霞始是霞。

對雪寄新定馮使君二首

仙掌空思歸未能。焚香冥日對殘燈。豈知瑞雪千山合。空覺春寒半夜增。翳月素雲埋粉堞。堆巢孤鶴下金繩。因思太守憂民切。吟對瓊枝喜不勝。政化由來通上靈。豐年祥瑞滿窗明。氣嚴坐久燈凝燄。片大更深屋作聲。飄掩煙霞何處去。欹斜杉竹向簾傾。雪中客雖無事。還有新詩半夜成。

送劉相公朝覲二首

九苞仙瑞曜垂衣。一品高標百辟師。魏相十思常自切。曹溪一句幾生知。久交王帳雖難別。須佐金輪去已遲。唯杜荊州最惆悵。柳門迴首落花時。

急徵祇是再登庸。生意人心萬國同。變理久徵殷傅說。譚真欲過李元通。程穿峴首春光老。馬速商於曙色紅。從此龍顏又瘦。寰瀛俱荷代天功。

避寇遊成福山院

成福僧留不擬歸。獼猴菌嫩豆苗肥。那堪蠶月偏多雨。況復衢城未解圍。

時孫端國逼衢城數月。

翠擁權籬泉亂入。雲

開花鳥雉雙飛。堪嗟大似悠悠者。祇向詩中話息機。

別李常侍

楚水和煙海浪通。又擎杯錫去山東。道情雖擬攀孤鶴。詩業那堪至遠公。夢入深雲香雨滴。吟搜殘雪石林空。朱門再到知何日。一片征帆萬里風。

送鄭開赴閩辟

便使書腹德無鄰。健筆從知又入閩。鸚鵡才須歸紫禁。眞珠履不稱清貧。武夷山夾仙霞薄。螺女潭通海樹春。從此應多好消息。莫忘江上一閑人。

寄信州張使君

水壇檉殿地含煙。領鶴行吟積翠間。數閣涼颺終日去。滿懷明月上方還。時來自有鸞鸞識。道在從如草木閑。唯羨靈溪賢太守。一麾清坐似深山。

春末寄周璉

暮角含風雨氣睡。寂寥薜翠上衣巾。道情不向鶯花薄。詩意自如天地春。夢入亂峰仍履雪。吟看芳草祇思人。手中孤桂月中在。來聽泉聲莫厭頻。

讀吳越春秋

猶來吳越盡須慙。背德違盟又信緣。辛語一言終殺伍。大夫七事祇須三。功成獻壽歌飄雪。誰愛扁舟水似藍。今日雄圖又何在。野花香徑鳥喃喃。

春遊靈泉寺

水蹴危梁翠擁沙。鐘聲微徑入深花。嘴紅澗鳥啼芳草。頭白山僧自杵茶。松色摧殘遭賊火。水聲幽咽落人家。因尋古跡空惆悵。滿袖香風白日斜。

春

自來自去動洪鑪。無象無私無處無。迴雁不多消氣力。染花應最費工夫。溟濛便恨豪家惜。濃暖深爲政筆驅。莫訝相逢只添睡。伊余心不在榮枯。

遇道者

鶴骨松筋風貌殊。不言名姓絕榮枯。尋常藜杖九衢裏。莫是商山一皓無。身帶煙霞游汗漫。藥兼神鬼在葫蘆。只應張果支公輩。時復相逢醉海隅。

贈鍾陵陳處士

否極方生社稷才。唯譚帝道鄙梯媒。高吟千首精怪動。長嘯一聲天地開。湖上獨居多草木。山前頻醉過風雷。吾皇仄席求賢久。莫待徵書兩度來。

懷鄰叟

常思東溪庀眉翁。是非不解兩頰紅。桔槔打水聲嚶嚶。紫芋白薤肥濛濛。鷗鴨靜遊深竹裏。兒孫多在好花中。千門萬戶皆車馬。誰愛如斯太古風。

贈軒轅先生

曾親文景上金鑾。語共蓉城語一般。久向紅霞居不出。若非清世見應難。滿鑪藥熟分仙盡。幾局棋終看海乾。略問先生真甲子。只言弟子是劉安。

偶作因懷山中道侶

是非非竟不真。桃花流水送青春。姓劉姓項今何在。爭利爭名愁殺人。畢竟輸他常寂默。只應贏得苦沈淪。深雲道者相思否。歸去來兮湘水濱。

送新羅人及第歸

捧桂香和紫禁煙。遠鄉程徹巨鼇邊。莫言挂席飛連夜。見說無風卽數年。衣上日光真是火。島旁魚骨大於船。到鄉必遇來王使。與作唐書寄一篇。

送新羅衲僧

扶桑枝西真氣奇。古人呼爲師子兒。六環金錫輕擺撼。萬仞雪嶠空參差。枕上已無鄉國夢。囊中猶挈石

頭碑。

南岳石頭大師劉
弼郎中作碑文也。

多慙不便隨高步。正是風清無事時。

春晚桐江上閑望作

江上車聲落日催。紛紛擾擾起紅埃。更無人望青山立。空有帆衝夜色來。沙鳥似雲鐘外去。汀花如火雨中開。可憐瀟灑鴟夷子。散髮扁舟去不迴。

商山道者

五千言外得元音。石屋寒栖隔雪林。多傍松風梳綠髮。只燒崖藥點黃金。潭澄龍氣來縈砌。月冷星精下聽琴。曾夢先生非此處。碧桃溪上紫烟深。

聞許棠及第因寄桂雍

時清道合出塵埃。清苦爲詩不仗媒。今日桂枝平折得。幾年春色併將來。勢扶九萬風初極。名到三山花正開。更有平人居塾屋。還應爲作一聲雷。

澱江秋居作

無事相關性自攄。庭前拾葉等閑書。青山萬里意下足。好竹數竿涼有餘。近看老經加澹泊。欲歸少室復

何如。面前小沼清如鏡。終養琴高赤鯉魚。

上縉雲段使君

清畏人知人盡知。縉雲三載得宣尼。活民刀尺雖無象。出世文章豈有師。尤氣芝香粘甕榼。雲痕翠點滿旌旗。今朝暫到金臺上。頗覺心如太古時。

春末蘭溪道中作

山花零落紅與緋。汀煙濛茸江水肥。人擔犁鋤細雨歇。路入桑柘斜陽微。深喜東州云寇去。不知西狩幾時歸。清平時節何時是。轉覺人心與道違。

野居偶作

高淡清虛卽是家。何須須占好煙霞。無心於道道自得。有意向人人轉賒。風觸好花文錦落。砌橫流水玉琴斜。但令如此還如此。誰羨前程未可涯。

鷺鷥有懷

前東陽王慆使君
養一鷺鷥名瑤花

粉魄霜華爲爾枯。鴛鴦相伴更堪圖。愛來沙島遺銀屋。終作金籠養雪鷗。栖宿必多清瀨夢。品流還次白猿徒。今朝不覺頻回首。曾伴瑤花近玉壺。

秋夜懷嵩少因寄洛中舊知

鐘彝旃檀不稱貧。霏霏玉露溼禪巾。紫金地上三更月。紅藕香中一病身。少室少年偏入夢。多時多事去無因。如今憔悴頭成雪。空想嵯峨羨故人。

避地毘陵寒月上孫徽使君兼寄東陵王使君三首

一到毘陵心更勞。冷吟閑步擁雲袍。豈緣思妙塵埃少。自是風清物態高。野色疎黃連楚甸。故山奇碧隔河橋。終須愚谷中安寔。不是人間好羽毛。常憶雙溪八詠前。講詩論道接清賢。文欺白鳳真難及。藥撚紅蕖豈偶然。花溼瑞煙粘玉磬。簾垂幽鳥啄苔錢。自憐不是悠悠者。吟嚼真風二十年。轟轟陣雨滴階聲。寂寞焚香獨閉扃。錦繡文章無路達。袴襦歌詠隔牆聽。松聲冷浸茶軒碧。苔點狂吞枳線青。唯有孤高江太守。不忘病客在禪靈。

秋末寄上桐江馮使君

山東山色勝諸山。謝守清高不可攀。薄俗盡于言下泰。若心唯到醉中閑。香凝錦帳抄書後。月轉棠陰送客還。野客密恩歸未得。蕭蕭霜葉滿柴關。

上盧使君二首

一領彤弓下赤墀。准將清淨作藩籬。馬卿山岳金相似。張緒風情柳不如。當作怨卑心染煙霞新句出。筆驅奸

蠹宿根墮。鄱陽黎庶還堪羨。頭有重天足有鷺。
司馬遷文亞聖人。三頭九陌儼香塵。盡傳棣萼麟兼鳳。終作昌朝甫與申。樓銓嬌歌疎雨過。風含和氣滿
城春。因知寰海昇平去。又見高宗夢裏人。

全五代詩卷五十四

前蜀

貫休八

陪馮使君遊六首

千霄亭

擁翠捫蘿山屐輕。飄飄紅旆在青冥。仙科朱紱言非貴。溪鳥林泉癖愛聽。古桂林邊棋局溼。白雲堆裏茗煙青。因思廬岳彌天客。手把金書倚石屏。

靈泉院

珂珮喧喧滿路歧。亂泉聲裏扣禪扉。對花語合希夷境。坐石苔黏黼黻衣。鳥啄古杉雲冉冉。風吹清磬露霏霏。惠巖亦有孤峯在。只戀繙經未得歸。

相思嶺

譽自馨香道自怡。相思嶺上卻無機。荒渠葉覆深霞在。片石人吟一鳥飛。何處風砧傳古曲。誰家塚樹挂斜暉。因思往事真堪笑。鶴背漁竿未是歸。

錦池墩

臨水登山興自奇。錦沙墩上最多時。雖云髮白孤峯好。其奈名清聖主知。草媚蓮塘資逸步。雲生松壑有新詩。翛然別是神仙趣。豈羨東山伎樂隨。

釣簪潭

境靜江清無事時。紅旌畫鷁動漁磯。心期只是行春云。日暮還應待鶴歸。風破綺霞山寺出。人歌白雪鳥花飛。自憐亦在僊舟上。玉浪翻翻濺草衣。

迎仙閣

澗香霞影遶樓臺。捲箔凭闌耳目開。況從旌旗近鸞鳳。可憐談笑出塵埃。火雲不入長松徑。露茗何須白玉杯。誰道迎仙仙不至。今朝還有謝公來。

感懷寄盧給事二首

縣縣遠念近來多。喜鵲隨函到綠蘿。雖匪二賢曾入洛。忽驚六義減沈疴。童扳鄰杏隳牆瓦。燕啄花泥落砌莎。好更因人寄消息。沃州歸去已蹉跎。常憶團圓繡像前。東歸經亂獨生全。孤峯已住六七處。萬事無成三十年。每想苑牆危逼路。更思鉢塔曉凌煙。如今憔悴荆枝盡。一諷來書一愴然。

遊金華山禪院

茲地曾棲苦薩僧。旃檀樓殿濕崩騰。因知境勝終難到。問著人來悉不曾。斜谷暗藏千載雪。薄嵐常翳一

龍燈多慙不及當時海。又下嵯峨一萬層。

宿赤松山觀題道人水閣兼寄郡守

珠殿香輶倚翠稜。寒棲吾道寄孫登。豈應肘後終無分。見說仙中亦有僧。雲斂石泉飛險竇。月明山鼠下枯藤。還如華頂清談夜。因有新詩寄鄭宏。

春遊涼泉寺

一到涼泉未擬歸。迸珠噴玉落階墀。幾多僧祇因泉在。無限松如潑墨爲。雲暫含香啼鳥細。茗甌擎乳落花遲。青山看著不可上。多病多慵爭奈伊。

經吳宮

夫差昏暗霸圖傾。千古淒涼地不靈。妖豔恩餘宮露濁。忠臣心苦海山青。蕭條陵隴侵寒水。彷彿樓臺出杳冥。此是前車況非遠。六朝何更不惺惺。

送薛侍郎貶峽州司馬

得罪唯驚恩未酬。夷陵山水稱閑遊。人如八凱須當國。援到三聲不用愁。花落扁舟香冉冉。草侵公署雨修修。因人好寄新詩好。不獨江東有沃州。

將入匡山宿韓判官宅

一宿蘭堂接上才。白雲歸去幾裴回。黛青峯朵孤吟後。雪白猿兒必寄來。簾卷茶煙榮墮葉。月明棋子落

深苔明朝江上空迴首。始覺清風不可陪。

聞迎真身

四海無波八表臣。恭聞今歲禮真身。七重鑲未開金鑰。五色光先入紫宸。丹鳳樓臺飄瑞雪。岐陽草木亞香塵。可憐優鉢羅花樹。三十年來一度春。

送鄭侍郎竊赴闕

文章國器盡琅玕。朝騎駉駉歲欲殘。彩筆祇宜天上用。繡衣偏稱雪中看。休驚斷雁離三楚。漸入祥煙下七槃。翰苑舊知憑與說。紫金輪畔寄書難。

上盧使君

一別旌旗已一年。二林真子勸安禪。常思雙戟華堂裏。還似孤峯峭壁前。步出林泉多吉夢。帆侵分野入祥煙。自憐酷似隨陽雁。霜打風飄到日邊。

寄匡山大願和尚

一聽元音下竹亭。卻思窗雪與囊螢。祇將清淨酬恩德。敢信文章有性靈。夢歷山牀聞鶴語。吟思海月上沙汀。不堪迴首滄江上。萬仞廬峯在杳冥。

別盧使君歸東陽二首

雨氣濛濛草滿庭。式微吟劇更誰聽。詩逢匠化唯貪住。日覺恩深不易銘。心苦祇應消鬢黑。夢遊頻入倚

天青從茲還似歸回首。唯祝台星與福星。
家在嚴陵釣渚旁。細漣嘉樹拂窗涼。難隣林藪煙霞癖。又出芝蘭父母鄉。孤帆好風千里暖。深花黃鳥一聲長。終期金鼎調羹日。再近尼邱日月光。

溪寺水閣閑眺因寄宋使君

溪水蕭條一凭闌。玉霜飛後浪花寒。釣魚船上風煙暝。古木林中砧杵乾。至竟道心方始是。空耽山色亦無端。誰如太守分憂外。時把西經盡日看。

春送趙文觀送故合州座主神礪歸洛

喜繼千悲錦水東。還鄉仙騎卻尋嵩。再燒良玉堯雲動。方報深恩絳帳空。遠道靈輿春欲盡。亂山羸馬恨無窮。他年必立吾君側。好把書紳答至公。

題某公宅

宅成天下借圖看。始笑平生眼力慳。地占百灣多是水。樓無一面不當山。荷深似入苕溪路。石怪疑行雁蕩間。只恐中原方鼎沸。天心未遣主人閑。

海覺禪師山院

人言海覺老宗師。隱絕層巔世莫知。青草不生行道跡。白雲常護坐禪扉。六環金錫飛來後。一派銀河瀉落時。借問大心能濟物。龍門風電捲天池。

悼張道古

昭宗時道古官拾遺以直諫貶蜀中死

清河逝水大恩恩。東觀無人失至公。天上君恩三載隔。鑑中鸞影一時空。墳生苦霧蒼茫外。門掩寒雲寂寞中。惆悵斯人又如此。一聲鸞笛滿江風。

寄題詮律師院

以下見統鑑

錦溪光裏聳樓臺。師院高凌積翠開。深竹杪聞殘磬盡。一茶中見數帆來。焚香只是看新律。幽步猶疑損綠苔。莫訝題詩又東去。石房清涼在天台。

寄天台葉道士

負局高風不可陪。玉霄峯北置樓臺。注參同契未將出。尋柳栗僧多宿來。鸞械松風山棗落。開闢溪鳥朮花開。終須肘後相傳好。莫便乘鸞去不迴。

送道友歸天台

蘚濃苔溼冷層層。珍重先生獨去登。氣養三田傳未得。藥非八石許還曾。雲根應狎玉斧子。月逕多尋銀地僧。太守苦留終不住。可憐江上去騰騰。

山居詩二十四首并序

愚咸通四五年中。於鍾陵作山居詩二十四章。放筆藁被人將去。厥後或有散書于屋壁。或吟

咏於人口。一首兩首。時時聞之。皆多字句舛錯。泊乾符辛丑歲。避寇於山寺。偶全獲其本。風調野俗。格力低濁。豈可聞於大雅君子。一日抽毫改之。或留之。除之。修之。補之。卻成二十四首。亦斐然也。蝕木也。槩山謳之例也。或作者氣合。始爲一朗吟之可也。

休話誼譚事事難。山翁只合住深山。數聲清磬是非外。一個閑人天地間。綠圃空階雲冉冉。異禽靈草水潺潺。無人與向羣儒說。岩桂枝高亦好扳。

難是言休卽便休。清吟孤坐碧溪頭。三間茆屋無人到。十里松陰獨自遊。明月清風宗炳社。夕陽秋色庾公樓。修心未到無心地。萬種千般逐水流。

萬境忘機是道華。碧芙蓉裏日空斜。幽深有徑通仙窟。寂寞無人落異花。掣電浮雲真好喻。如龍似鳳不須誇。君看江上英雄塚。只有松根與柏槎。

鞭後從他素髮兼。湧清奔碧冷侵簾。高奇章句無人愛。澹泊身心舉世嫌。白石橋高吟不足。紅霞影暖臥無厭。居山別有非山意。莫錯將予比宋纖。

慵甚嵇康竟不迴。何妨方寸似寒灰。山精日作兒童出。仙老時將玉器來。筠帚掃花驚睡鹿。地爐燒樹帶枯苔。不行朝市多時也。許史金張安在哉。

心心心不住希夷。石屋巉巖白髮垂。養竹不除當路筍。愛松留得礙人枝。焚香開卷霞生砌。捲箔冥心月在池。多少故人頭盡白。不知今日又何之。

五嶽煙霞連不斷。三山洞穴去應通。石窗欹枕疎疎雨。水碓無人浩浩風。童子念經深竹裏。彌猴拾蠅夕陽中。因思往事拋心力。六七年來楚水東。

塵埃中更有埃塵。時復雙眉十爲顰。賴有年光飛似箭。是何心地亦稱人。回賢參孝時時說。蜂蠆狼貪日日新。天意剛容此徒在。不堪惆悵不堪陳。

翠竇煙巖畫不成。桂華瀑沫雜芳馨。撥霞掃雪和雲母。掘石移松得茯苓。好鳥傍花窺玉磬。嫩苔和水沒金餅。從他人說從他笑。地覆天翻也只寧。

嵐嫩風輕似碧紗。雪樓金像隔煙霞。葛苞玉粉生香壠。菌簇銀釘滿淨植。舉世只知嗟逝水。無人微解悟空花。可憐擾擾塵埃裏。雙鬢如銀事似麻。

千巖萬壑路傾欹。杉檜濛濛獨掩扉。斷藥童穿溪磳去。採花蜂冒曉煙歸。閑行放意尋流水。靜坐支頤到落暉。長憶南泉好言語。如斯癡鈍者還稀。

南泉大師云。學道之人。癡鈍者難得。

一菴冥目在穹冥。菌枕松牀薜蘿青。乳鹿暗行檀徑雪。瀑泉微濺石樓經。閑行不覺過天井。長嘯深能動岳靈。應恐無人知此意。非凡非聖獨醒醒。

桴刻芙蓉傳永漏。休誇麗藻鄙湯休。且爲小國盛紅粟。別有珍禽勝白鷗。拾栗遠尋深澗底。弄猿多在小峯頭。不能更出塵中也。百煉剛爲繞指柔。

業薪心火日燒煎。浪死虛生自古然。陸氏稱龍終妄矣。漢家得鹿更空焉。白衣居士深深說。青眼胡僧遠
遠傳。剛地無人知此意。不堪惆悵落花前。

露滴紅蘭玉滿畦。閑拖象屣到峯西。但令心似蓮花潔。何必身將槁木齊。古壑細煙紅樹老。半岩殘雪白
猿啼。雖然不是桃源洞。春至桃花亦滿蹊。

自休自己自安排。常願居山事偶諧。僧採樹衣臨絕壑。金華山出樹衣。僧多採爲蔬菜。味極美也。狢爭山果落空階。閑擔茶器緣

青嶂。靜衲禪袍坐綠崖。虛作新詩反招隱。出來多與此心乖。

石鑪金鼎紅蕖嫩。香閣茶棚綠嶺齊。塢燒崩騰奔澗鼠。岩花狼籍鬪山雞。蒙莊環外知音少。阮籍途窮旨
趣低。應有世人來覓我。水重山疊幾層迷。

自古浮華能幾朝。逝波終日去滔滔。漢王廢苑生秋草。吳主荒宮入夜濤。滿屋黃金機不息。一頭白髮氣
猶高。豈知知足金仙子。霞外天香滿毳袍。

如愚何止直如弦。只合深藏碧嶂前。但見山中常有雪。不知世上定何年。野人愛向菴前笑。赤纓頻來袖
畔眠。只有逍遙好知己。何須更問洞中天。

支公放鶴情相似。范泰論交趣不同。有念盡爲煩惱相。無私方稱水晶宮。香焚薝蔔諸峯曉。珠摺金剛萬
境空。若買山資言不及。恆河沙劫用無窮。

好鳥聲長睡眼開。好茶擎乳坐莓苔。不聞榮辱成番盡。只見熊羆作隊來。詩裏從前欺白雪。道情終遣似嬰孩。由來此事知音少。不是眞風去不迴。

鳥外塵中四十秋。亦曾高挹漢諸侯。如斯標致雖清拙。大丈夫兒合自由。紫朮黃菁苗戢戢。錦囊香麝語啾啾。終須心到曹溪叟。千歲檣根雪滿頭。

龍藏琅函遍九垓。霜鍾金鼓振瓊臺。堪嗟一句無人得。遂使吾師特地來。無角鐵牛眠少室。生兒石女老黃梅。令人轉憶龐居士。天上人間不可陪。

騰騰兀兀步遲遲。兆朕消磨只自知。龍猛金膏雖未作。孫登土窟且相宜。薜蘿山帔偏能綰。橡栗年糧亦且支。已得眞人好消息。人間天上更無疑。

全五代詩卷五十五

前蜀

貫休九

蜀王入大慈寺聽講

天復三年作

玉節金珂響似雷。水晶宮殿步裴回。祇緣支遁談經妙。所以許詢都講來。帝釋鏡中遙仰止。

善法堂前有七寶鏡。照四天下。

魔軍殿上動崔巍。千重香擁龍鱗立。三種風生錦繡開。

上界天王欲下遊。行時先有三種風生。一開其樓臺殿閣。二香氣芬馥。三吹去萎花更雨新者。

寬似大溟生。

日月秀如四岳出塵埃。一條紫氣隨高步。九色仙花落古臺。謝太傅須同八凱。姚梁公可並三台。登樓喜色禾將熟。望國誠明首不迴。駕駁英雄如赤子。雌黃賢哲貢瓊瑰。六條消息心常苦。一劍晶熒敵盡摧。木鐸聲中天降福。景星光裏地無災。百千民擁聽經座。始見重天社稷才。

賀鄭使君

三衢峰藁陷城池。入詠龍韜整武貔。纔諭危亡書半幅。便思父母淚雙垂。

時公檄書纔去。即便歸降。來款云。思父母則血淚雙垂。憶兄弟乃江山隔越。

戈收甲束投仁境。汗浹魂飄拜虎旗。死地再生知德重。精兵連敵覺山移。人和美叶禎祥出。陣善深爲典

教推仗信輸誠方始是。執俘折馘欲何爲。清威嚴令無纖盭。長路深山不拾遺。七邑恩波歌浩渺。一方雲物自鮮奇。天文仰視同諸掌。劍術無前更數誰。戰馬閑眠汀草遠。秋聲乾揭岳霞墜。義爲土地精靈伏。仁作金湯鐵石卑。龔逢劉寬同煦嫗。張飛關羽太驅馳。笙歌席上偏憐客。刀劍林中亦念詩。穀渚美爲長飲水。金山高作受降碑。時猶草草秋方盡。陳是堂堂孰敢窺。龍渥豈唯分節鉞。勳庸須勒上鍾彝。神資天贊誰堪比。名遂功成自不知。捲箔倚闌雲欲雪。擁鑪傾榼酒如飴。扶藹社稷常憂老。到郭汾陽亦未遲。釋子沾恩無以報。只將葑菲賀階墀。

送鄭使君

刺嫫廉閩動帝臺。唯將清淨作梯媒。綠沈槍卓妖星落。白玉壺澄苦霧開。仁愛久懸溪上月。恩光又發嶺頭梅。天資劉邵裴黃筆。神助韓彭衛霍才。古驛劍江分掩映。畫旗花舫下喧豗。鳳麟帝幕芙蓉坼。洞壑清威霹靂來。禮樂封疆添禮樂。塵埃時節勿塵埃。荔支花下驅千騎。薔薇林中禮萬迴。時入安大師在回院也。視事蠻奴磨玉硯。邀賓海月射金杯。謳歌合合千門樂。鼓角雄雄一閣雷。君父恩深頭早白。子孫榮襲日難陪。東陽緇素如何好。空向生祠祝上台。

贈楊公杜之舅

分盡君憂一不遺。鳳書徵入萬民悲。風雲終日如相逐。雨露前程卽可知。畫舸還盛江革石。秋山又看謝

安棋談諸盡是經邦術。頭角由來出世姿。天地事須歸橐籥。文章誰得到罍罍。扣舷傍島清吟健。問俗看漁晚泊遲。霞影滿江搖枕簟。鳥行和月下漣漪。周秦漢魏書書在。麟鳳龜龍步步隨。金殿恩波將浩浩。圭風意緒謾孜孜。郡中條令春常在。境外謳謠美更奇。道者藥蘊留要妙。林僧禪偈寄相思。王楊盧駱真何者。房杜蕭張更是誰。應念衢民千萬戶。家家皆置一生祠。

月夕

霜月夜裴回。樓中羌笛催。曉風吹不盡。江上落殘梅。

夜雨

夜雨山草溼。爽籟雜枯木。閑吟竺仙偈。清絕過于玉。

晚望

落日碧江靜。逆唱清且閑。更尋花發處。借月過前灣。

早霜寄蔡大

昨夜楚鐘鳴。飛霜下楚城。定知遷客鬢。先向鑑中生。

道情偈三首

崆峒老人專一一。黃梅真叟卻無無。獨坐松根石頭上。四溟無限月輪孤。非色非空非不空。空中真色不玲瓏。可憐盧大擔柴者。拾得驪珠橐籥中。

優鉢羅花萬劫春。頻犁田地絕纖塵。道吾道者相招好。不是香林採葉人。

馬上作

柳岸花堤夕照紅。風清襟袖轡璫。行人莫訝頻迴首。家在凝嵐一點中。

道中逢乞食老僧

赤椶欄笠眉毫垂。拄柳栗杖行遲遲。時人祇施孟中飯。心似白蓮那得知。

秋末寄武昌一公

且說武昌江上住。柏枯槐朽戰時風。知師詩癖難醫也。霜灑蘆花明月中。

陋巷

墜葉如花欲滿溝。破籬荒井一蟬幽。亦知希冀無希者。作麼令人強轉頭。

終南僧

聲利掀天竟不聞。草衣木食度朝昏。遙思山雪深一丈。時有仙人來打門。

聽僧彈琴

家近吳王古戰城。海風終日打牆聲。今朝鄉思渾堆積。琴上聞師大蟹行。

漁者

風惡波狂身似閑。滿頭霜雪背青山。相逢略問家何在。回指蘆花蒼莽間。

歸東陽臨岐上杜使君七首

小謝清高大謝才。聖君令泰此方來。一從到後常無事。鈴閣公庭滿綠苔。
紅錦帳中歌白雪。烏皮几畔撫青英。不知何物爲心地。賽卻澄江徹底清。
誰報田中有黑蟲。一家齋戒減仙容。分憂苦也皆如此。天下家家有剩春。

憂民心切出衝災。禾稼如雲喜氣兼。林下閑人亦何幸。也隨旌旆到銀尖。
銀尖去郭二十里。

方恐獄中桃樹出。忽聞枯木卻生煙。
時有枯木再生。禱祥爲郡曾如此。卻恐當時是偶然。

枯骨縱橫遍水湄。盡收爲塚碧參差。分明爲報精靈輩。好送旌旗到鳳池。
捨魯依劉一片雲。好風吹去遠纖塵。猶期明月清風夜。來作西園第八人。

再遊東林寺作五首

臺殿參差聳瑞煙。桂花飄雪水潺潺。莫疑遠去無消息。七萬餘年始半年。

傳記盡云。安遠持柴三車盡生兜率天。人間四千年。彼天一晝夜。亦三十日爲

一月。十二月爲一年。壽四千歲。

桓元舊輦殘雲溼。耶舍孤墳落照遲。有箇山僧倚松睡。恐人來取白猿兒。
玉像珠龕香陣橫。錦霞多傍石牆生。辟蛇行者今何在。花裏唯聞鴝鳥聲。

愛陶長官醉兀兀。送陸道士行遲遲。買酒過溪皆破戒。斯何人斯師如斯。

遠公高節。食後不飲蜜水。而將詩傳緣。酷與陶潛。別人不得。又送客不以貴賤。

不過虎溪。而送陸靜修道士過虎溪數百步。今寺門前有道士岡。送道士至此止也。

白蘿蔔花露滴滴。紅苾芻草香濛濛。田地更無塵一點。是何人合住其中。

題蘭江言上人院二首

時王謫先輩有詩二首題其院。因和題之。

一生只著一麻衣。道業還欺習彥威。手把新詩說山夢。石橋天柱雪霏霏。只是危吟坐翠層。門前歧路自崩騰。青雲名士時相訪。茶煮西峯瀑布冰。

禪師

擊鼓求亡益是非。木中生火更何爲。吾師別是醍醐味。不是知心人不知。

道士

花鳥相逢滿袖雲。藉花論道過金巾。騰騰又入仙山去。只恐是青城丈人。

風琴

至境心爲造化功。一枝青竹四弦風。寥寥雙耳更深後。如在縑山明月中。

庭橘

蟻踏金苞四五株。洞庭山上味何殊。不緣松樹稱君子。肯便甘人喚木奴。
落花

蝶醉蜂癡一簇香。繡葩紅蒂墮殘芳。因嗟好德人難得。公子王孫盡斷腸。
孤雲

將比鷺鷥還恐屈。始思殘雪不如多。清風相引去更遠。皎潔孤高奈爾何。
苦吟

河薄星疎雪月孤。松枝清氣入肌膚。因知好句勝金玉。心極神勞特地無。
古戰處

鬼氣蒼黃棘葉紅。昔時人血此時風。相憐極目無疆地。曾落將軍一陣中。
偶然作

蟬聲引出石中蛩。寂寞門扃葉數重。誰道思山心不切。等閑盡出兩三峯。
招友人宿

銀地無塵金菊開。紫梨紅棗墮莓苔。一泓秋水一輪月。今夜故人來不來。
再逢虛中道士三首

天目西峯古壤壇。壇邊相別雪漫漫。如今四十餘年也。還共當時恰一般。

囊裏靈龜小似錢。道伊年與我同年。壺中長挈天相逐。何處昇天更有天。
吾道將君道且殊。君鬚全似老君鬚。尋常有語爭堪信。愛說蟠桃似甕麤。

寄鄭道士二首

常憶蘇耽好羽儀。信安山觀住多時。不知玉質雙棲處。兩箇仙人是阿誰。
誰帶金輪髻裏珠。何妨相逐去清都。舊山大有閑田地。五色香茆有子無。

送少年禪師二首

秀眉清目樹花衣。鉢隨緣智不知。佛與輪王嫌不作。世間剛有箇癡兒。
萬水千山一鶴飛。豈愁遊子暮何之。古今此著無人會。王積新輪更不疑。

古劍池

秋水蓮花三四枝。我來慷慨步遲遲。不決浮雲斬邪佞。真成龍去擬何爲。

曹娥碑

高碑說爾孝應難。彈指端思白浪間。堪歎行人不迴首。前山應是苧蘿山。

比干傳

昏王亡國豈堪陳。只見明誠不見身。想得先生也知自。欲將留與後來人。

送人遊茆山

鳥啼花笑煖紛紛。路入青雲白石門。君到前頭好看好。老僧或恐是菰君。
聞杜宇

咽雨哀風更不停。春光於爾豈無情。宜須喚得謝豹出。方始年年無此聲。

聽曉角

三會單于滿闌風。五行無忒月朦朧。如何十萬家休戚。只在嗚咽咽中。
贈寫經僧楚雲

剔皮刺血誠何苦。爲寫靈山九會文。十指漉乾終七軸。後來求法更無君。
律師

薔薇花紅徑草青。雪膚冰骨步輕輕。今朝暫到焚香處。只恐牀前有蝨聲。
書石壁禪居屋壁

赤旂檀塔六七級。白菌菰花三四枝。禪客相逢只彈指。此心能有幾人知。

全五代詩卷五十六

前蜀

晏城

晏城禪月大師貫休弟子著有重集評氏說文

十國春秋。晏城戒學精嚴。能詩善篆。貫休詩集皆出所校輯。

宿鄭諫議山居

堂開星斗邊。大諫探薇還。禽隱石中樹。月生池上山。涼風吹詠思。幽語隔禪關。莫擬歸城計。終妨此地閑。

禪島雲禪師

遠庵枯葉滿。羣鹿亦相隨。頂骨生新髮。庭松長舊枝。禪高太白月。行出祖師碑。亂後潛來此。南人總不知。

懷齊己

鬢髯秋景兩蒼蒼。靜對茅齋一炷香。病後身心俱澹泊。老來朋友半凋傷。峨眉山色侵雲直。巫峽灘聲入夜長。猶喜深交有丈遁。時時音信到松房。

掃地和尙

和尙不知何許人

十國春秋。王建據蜀之後。有一僧常持大帝。每過必汎掃。人以掃地和尙目之。掃畢。輒寫二語。其後王衍果有秦川之禍。水行仙衍字也。

水行仙怕秦川

太后徐氏

太后徐氏驃騎大將軍暉之女建卽位册爲淑妃衍立尊爲順聖太后

詩歸詩話成都徐暉有二女皆國色教爲詩有藻思暉家

甚贊相者曰公不久當大富貴暉使相其二女相者曰青城山王氣徹天一紀矣不十年有真人承運此女當作后妃君之貴由二女致也及王建入城聞其姿色納于後房姊生彭王妹生衍建卽位姊爲淑妃妹爲貴妃暉爲驃騎大將軍及衍卽位册貴妃爲順聖太后淑妃爲翊聖太妃衍常與母同禱于青城山宮人畢從皆服雲霞之衣衍自製甘州詞令宮人歌之其詞哀憤聞者懷愴又至漢川看聖燈又游元都觀至德寺各有唱和詩刻于石及回至天回驛又各賦詩衍旣荒于酒色太后與妃各有幸臣不能相規正以至失國唐郭崇韜破蜀衍降行至秦川莊宗川伶人景進計迫宦者向延嗣誅其族衍母徐氏臨刑呼曰吾兒以一國迎降反以爲戮信義俱棄吾知其禍不旋踵矣遂遇害蜀志云衍至青城住旬日設醮祈福太妃太后謁建鑄像及丈人觀元都觀金華宮景山至德寺各有唱和詩刻于石次至彭州陽平化漢州三學山夜看聖燈回至天回驛又各賦詩議者以爲翰林之事非婦人女子之能所以謝女無長城之志空振才名班姬有團扇之詞亦彰淫惡今徐氏逞乎妖志餌自倖臣假以風騷庇其游伴取女史一時之美爲游人曠代之嗤及唐朝興弔伐之師遇蜀國有荒淫之主三軍不戰束手而降殄滅萬象流移百郡其次六宮嬪御坐紅綠于征途十宅公主碎金珠于逆旅良由子母盤遊君臣陵替之所致也

題謁丈人觀先帝聖容

聖帝歸梧塹躬來謁聖顏旋登三徑路似涉九嶷山日照惟嵐迫雲橫積翠間斯修封禪禮方俟再躋攀

題金華宮

再到金華頂。元都訪道回。雲披分景象。黛鎖顯樓臺。雨滌前山淨。風吹去路開。翠屏夾流水。何必羨蓬萊。

題彭州平陽宮

尋真游勝境。巡禮到陽平。水遠波流闊。山高氣象清。殿嚴孫氏貌。碑暗係師名。夜月登壇醮。松風森碧聲。

題灌州三學山至夜看聖燈

虔禱遊靈境。元妃夙志同。玉香焚靜夜。銀燭炫遼空。泉漱雲根月。鐘敲松杪風。印金標聖迹。飛石顯神功。滿望天涯極。臨西日腳紅。猿來齋室上。僧集講筵中。頓覺超三界。渾疑證六通。願成修假事。社稷保延洪。

題青城面山丈人觀

早與元妃慕至元。同躋靈嶽訪真仙。當時信有壺中景。今日親來洞裏天。儀仗影交寥廓外。金絲聲揭翠微巔。惟慚未致華胥理。徒卜昇平萬萬年。

題丹景山至德寺

周迴雲水游丹景。回輦真成眺上方。晴日曉昇金晃耀。寒泉夜落玉丁當。松梢月轉禽栖影。柳徑風牽麝食香。虔懺六銖宜禱祝。惟期聖祚保遐昌。

謁丈人觀先帝御容

千尋綠嶂夾流溪。登眺應知海岳低。瀑布迸春青石碎。輪囷橫剪翠峰齊。步粘苔蘚龍橋滑。目閉烟蘿鳥

徑迷莫道穹天無路到此山便是碧雲梯。

禱青城山回

周遊靈境散幽情。千里江山暫得行。所恨風光看未足。卻驅金翠入龜城。

太妃徐氏

太妃徐氏順聖太后之妹。建冊爲貴妃。生後主衍。及衍立。尊爲翊聖太妃。

十國春秋。太妃徐氏。畊次女也。高祖時。進位淑妃。宮

中稱爲花蕊夫人。亦曰小徐妃。光天元年夏六月。尊爲皇太妃。咸康元年。隨後主降唐。明年李繼昭等部送入洛。行至天回驛。太妃與太后賦詩。悽惋不可聽聞。已而秦川之禍。與太后同華命焉。

謁丈人觀先帝御容

共謁御容儀。還同在禁闈。笙歌喧寶殿。彩仗耀金徽。清淚沾羅袂。紅霞拂繡衣。九疑山水遠。無路斷湘姬。

題漢川三學山至夜看聖燈

聖燈千萬炬。旋向碧雲生。細雨溼不暗。好風吹更明。聲敲金地響。僧唱梵天聲。若說無心法。此光如有情。

題金華館

碧雲紅霧撲人衣。宿路沾苔石徑危。風巧解吹松上曲。蝶嬌頻采臉邊脂。同尋僻徑思攜手。暗指遙山學畫眉。好把身心清淨出。角冠霞帔事希夷。

題彭州陽平池

雲浮翠輦屈陽平。真似騰鸞到上清。風起半崖聞虎嘯。雨來當面見龍行。晚尋水澗聽松韻。夜上星壇看月明。長恐全身居此境。玉堂教向錦城生。

題丹景山至德寺

丹景山頭宿梵宮。玉軒金輅駐虛空。軍持無水注寒碧。蘭若有花開晚紅。武士盡班青障下。內人皆在講筵中。我家帝子專王業。積善終期四海同。

題青城山面丈人觀

獲陪翠輦喜殊常。同陟仙壇豈厭長。不羨乘鸞入烟霧。此中便是五雲鄉。

題謁丈人觀

登尋丹壑到元都。接日紅霞照座隅。卽向周迴岳上看。似看曾進畫圖無。

禱青城山回

翠驛江亭近玉京。夢魂猶是在青城。比來出看江山景。卻被江山看出行。

昭儀李舜弦

舜弦梓州人。珣之妹。蜀王衍納爲昭儀。十國春秋。舜弦酷有詞藻。所著蜀宮應制詩。隨駕詩。釣魚不得詩。諸篇多爲文人賞鑒。

蜀宮應制

濃樹禁花開後庭。飲筵中散酒微醒。濛濛雨草瑤階溼。鐘曉愁吟獨倚屏。

釣魚不得

盡日池邊釣錦鱗。菱荷香裏暗消魂。依稀縱有尋香餌。知是金鉤不肯吞。

隨駕遊青城

因隨八馬上仙山。頓隔塵埃物象閑。只恐西池王母宴。卻憂難得到人間。

李玉簫

玉簫蜀王衍宮人

十國春秋。玉簫龍亞舜鼓。後主妹近臣。命玉簫歌。已所撰月華如水宮詞。侑宗壽酒。一座傾倒。

宮詞

鴛鴦瓦上瞥然聲。晝寢宮娥夢裏驚。元是我王金彈子。海棠花下打流鶯。

嚴氏

嚴氏天雄軍節度使王承休妻

十國春秋。承休以宦者得幸。爲宣徽使。先是唐昭宗世。宦官雖盛。未有建節一方者。得爲節度。自承休始。妻嚴氏有絕色。後主衍通之。咸康七年。以嚴故。爲秦川之

行。絕加寵愛。至則賜以妝鏡。有詞云。其幸呢如此。

妝鏡銘詞

鍊形神治。瑩質良工。當眉寫翠。對臉傅紅。如珠出匣。似月停空。綺窗繡幌。俱涵影中。

黃崇嘏

崇嘏。臨邛人。黃使君女。

十國春秋。周庠。權知邛州臨邛縣。遂失火。人黃崇嘏。上詩云。庠召見之。稱鄉貢進士。祇對詳敏。隨命釋放。後數日。復獻長歌。益奇之。薦攝司戶參軍。胥吏畏服。案牘一清。庠欲以女妻

之。崇嘏乃爲謝狀。仍貢詩見意。詩云。庠覽詩。驚問。故黃使君女也。幼失父母。與老嫗同居。元未字人。已乞罷歸。臨邛。不知所終。

辭蜀相妻女詩

一辭拾翠碧江湄。貧守蓬茅但賦詩。自服藍衫居郡掾。永拋鸞鏡畫蛾眉。立身卓爾青松操。挺志鏗然白璧姿。幕府若容爲坦腹。願天速變作男兒。

下獄貢詩

偶辭幽隱在深邛。行止堅貞比澗松。何事政清如水鏡。絆他野鶴在深籠。

任氏

任氏。尚書侯繼圖妻。

王漁陽五代詩話。繼圖讀書大慈寺。忽桐葉飄墜。上有詩句。後數年卜婚任氏。方知桐葉句乃任氏在左綿書也。

書桐葉

拭翠斂蛾眉。鬱鬱心中事。搗管下庭除。書成相思字。此字不書石。此字不書紙。書在桐葉上。願逐秋風起。

天下有心人。盡解相思死。天下負心人。不識相思字。有心與負心。不知落何地。

張窈窕

窈窕寓居於蜀。當時詩人雅相推重。

吟窗雜錄。窈窕有春情句云。滿院花飛人不到。含情欲語燕雙雙。

成都卽事

昨日賣衣裳。今日賣衣裳。衣裳渾賣盡。羞見嫁時箱。有賣愁仍緩。無時心轉傷。故園有廢隔。何處事蠶桑。

西江行

日下西塞山。南來洞庭客。晴空白鳥度。萬里秋光碧。

寄故人

淡淡春風花落時。不堪愁望更相思。無金可買長門賦。有恨空吟團扇詩。

春思二首

門前梅柳爛春輝。閉妾深閨繡舞衣。雙燕不知腸欲斷。銜泥故故傍人飛。井上梧桐是妾移。夜來花發最高枝。若教不向深閨種。春過門前爭得知。

贈所思

與君咫尺長離別。遺妾容華爲誰說。夕望層城眼欲穿。曉臨明鏡腸堪絕。

灼灼

灼灼成都人。韋莊浣花集。灼灼蜀之麗人也。近聞貧且老。墮落于成都市中。因以四韻吊之。其詩有桃臉曼長橫綠水。玉肌香膩透紅紗之句。見韋集中。

春愁

自有春愁正斷魂。不堪芳草思王孫。落花寂寂黃昏雨。深院無人獨倚門。

尼海印

海印慈光寺尼。唐末蜀人。

舟夜

水色連天色。風聲益浪聲。旅人歸思苦。漁叟夢魂驚。舉棹雲先到。移舟月逐行。旋吟詩句罷。猶見遠山橫。

觀梅女仙

題壁

蜀州郡閣有紅梅數株。方盛開。有二婦人高髻大袖倚闌而觀。題詩於壁。

南枝向暖北枝寒。一種春花有兩般。憑仗高樓莫吹笛。大家留取倚闌看。

崇聖寺鬼

漢州崇聖寺。寒食日忽有朱衣一人。紫衣一人。驅殿僕馬極盛。各題一絕。句于壁而去。失其所在。

題絕

禁烟佳節同遊此。正值醅醖夾岸香。回首十年前往事。強吟風景亂愁腸。朱衣人。
策馬暫尋原上路。落花芳草尙依然。家亡國破一場夢。惆悵又逢寒食天。紫衣人。

張仁寶

題芭蕉葉上

校書郎張仁寶。素有才學。年少而逝。白成都歸葬閬中。櫬殯東津寺。其家寒食日聞扣門甚急。出視無人。唯見門上有芭蕉葉題詩。端午日又聞扣門聲。其父于門畔伺之。見其子身長三丈許。足不踐地。門上題五月

五日天中節題。未畢。其父開門卽失所在。

寒食家家盡禁烟。野棠風墜小花鈿。如今空有孤魂夢。半在嘉陵半錦川。

蜀選人

嘲韓昭

全唐詩話。蜀王衍時。韓昭爲吏部侍郎。受賂徇私。選人詣鼓院訴之。并嘲云。衍召問昭。昭曰。此皆太后太妃國舅之親。非臣之親。帝默然。

嘉眉叩蜀侍郎骨肉。導江青城侍郎情親。果園二州侍郎自留。巴蓬集壁侍郎不識。

秦人竹貓謠

貓貓引黑牛。天差不自由。但看戊寅歲。揚在蜀江頭。

王氏見聞云。竹貓食竹之鼠。肉肥脆。生深山竹林無人境。岐梁駐毗之年。此物徧入人家房內。秦人口腹厭焉。忽有童謠云。智者不能

識之。庚午歲。梁劉知俊叛。梁入秦。岐王以爲涇州節度。知俊爲人色黑。而其生歲在丑。貓者劉也。始知貓貓引黑牛之應。後奔蜀。王建用之。令反攻岐。有功。竟忌而殺之。歲戊寅。建不豫。見劉爲祟。因粉劉骨投之江。其言揭在曲江頭。亦驗云。又建陰忌劉知俊才。蜀人亦共嫉。

之。建諸子皆以宗承爲名。乃於里巷構爲謠言云。黑牛無繫絆。縶繩一時斷。建慮爲子孫害。益惡之。故殺知俊。

秦城芭蕉謠

花開來裏花謝也裏

天水地寒。不產芭蕉。戎帥亭臺有二本。入冬卽埋藏於地窟。候春再植之。庚午辛未間。有童謠云云。時節氣變而不寒。芭蕉花開。蜀人犯封疆。年年一來不失。芭蕉開謝之候。自隴之西。竟爲蜀有。蓋劍外節氣先布于

秦城也。

蜀童謠

我有一帖藥。其名曰阿魏。賣與十八子。

蜀王衍時有此謠。乾德末。衍兄宗弼果賣國歸唐。而宗弼乃王建養子。本姓魏氏。皆驗。

眉州歌

十國春秋。張琳許州人。爲眉州刺史。修堰溉田。民被其惠。歌云云。

前有章仇後張公。疏決水利杭稻豐。南陽杜詩不可同。何不用之代天工。

瓦棺銘

學圃靈蘇。王蜀秦州節度使王承檢築防番城。至上邽山下。得一瓦棺。有片石刻篆字曰。大隋開皇二年。渭州刺史張崇妻夫人王氏年二十五卒。銘云云。是歲爲乾德六年丙子歲也。合郎卽王承檢小字。

車道之北。邽山之陽。深深葬玉。鬱鬱埋香。刻斯貞石。煥乎遺芳。地變陵谷。險列城隍。乾德丙年。壞者合郎。

成都羅城北門石記

上有乾符三年高駢名銜。餘字斷缺。莫知其爲何詩也。

五五復五五。五五逾重數。浮世若浮雲。金石一如故。與君相見時。杳杳非今土。

全五代詩卷五十七

後蜀

後主孟昶

昶字保元。初名仁贊。邢州人。蜀主知祥第三子。明德元年。立爲太子。在位二十八年。國亡降宋。封秦國公。卒贈楚王。謚恭惠。嘗集古今韻會五百卷。

十國春秋。廣政四年。帝下詔郡縣曰。朕念赤子。肝食宵衣。托之令長。撫養安綏。政在三異。道在七絲。雖

爲理。留犢爲規。寬猛得所。風俗可移。無令侵削。無使瘡痍。下民易虐。上天難欺。賦輿是切。軍國是資。朕之爵賞。固不論時。爾俸爾祿。民膏民脂。爲人父母。罔不仁慈。勉爾爲戒。體朕深恩。帝好學爲文。皆本於理。居恆謂李昊。徐光溥曰。王衍浮薄而好輕艷之辭。朕不爲也。今州縣戒碑。爾俸爾祿。民膏民脂。下民易虐。上天難欺。卽節巖中語。五年三月。帝宴牡丹苑。牡丹花凡雙開者十黃者白者三。紅白相間者四。又有深紅。淺紅。深紫。淺紫。淡黃。錫黃。潔白。正暈。倒暈。金含稜。銀含稜。旁枝副搏。合歡重臺。每朵至五十葉。面徑七八寸。復有檀心如墨者。香聞至五十步。從官皆賦詩賞之。十二年八月。帝遊浣花溪。御龍舟觀水嬉。時百姓饒富。夾江皆柳亭榭。都人士女。傾城遊玩。珠翠羅綺。名花異卉。覆郁十里。望者有若神仙之境。帝謂左右曰。曲江金殿鎖千門。殆未及此。兵部尙書王廷珪賦詩曰。十字水中分島嶼。數重花外見樓臺。帝稱善久之。十月。賞紅梔花于芳林苑。大宴百官。花本青城山叟所貢。初進紅梔子三粒。種之成樹。其花爛紅。六出。清香如梅。當時最重之。十四年。詔勒諸經于石。祕書郎張紹文寫毛詩儀禮禮記。祕書省校書郎孫朋古寫周禮。國子博士孫逢吉寫周易。校書郎周德政寫尙書。簡州平泉令張德昭寫爾雅。字皆精謹。乾德四年。重陽節。曲宴羣臣于宣華苑。後主唱韓琬柳枝詞。宋光浦欲以謠爲諷。遂咏

胡曾詩曰。吳王恃霸棄雄才。食向姑蘇醉綠醅。不覺錢塘江上月。一宵西送越兵來。聲節悽惋。後主不樂而罷。初高祖據有一方。晚年耑務奢侈。尚食掌食典至百卷。中有賜緋羊酒骨槽等名。寢室常設畫屏七十。帳閣百紐而合之。號曰帳宮。又有皇明帳。色淺紅。類蛟綃。於闕文中具十洲三島之象。夜則燦爛如金箔。施之大小牀。皆稱。後主初襲位。頗勤政事。寢處惟紫羅帳。碧綾帷。褥無錦繡諸飾。至于盥漱之具。但用白金。雖以黑漆木器。性復仁慈柔懦。每決死刑。多所矜減。月旦必素煢醅。喜薺藥。因呼薺藥爲月一盤。初竄走馬。後漸以體重不耐乘馬。內殿惟飼打毬馬一匹。出則乘步輦。蔽以重簾。環結珠香囊。垂于四角。香聞數里。人罕觀其面。居恆巡行宮內。惟銅裝朱漆小轝而已。且數年間一南郊。不放燈火。中歲稍稍以侈靡爲樂。常命一棧織成錦被。凡三幅。帛上鑲二穴。名曰鸞衾。又以芙蓉花偏染綵爲帳幔。名曰芙蓉帳。至溺器皆以七寶裝之。宋太祖見寶裝溺器。撞碎之曰。汝以七寶飾此。當以何器貯食。所爲如此。不亡何待。每臘日。內官各獻羅體圈。金花樹。所費不貲。又廣政中。民質錢取息者。將徙居。必勝其門曰。召主取贖。識者以爲召者趙也。贖者蜀也。末年成都文武官競執長鞭。自馬至地。號曰朝天。婦女爭治髮爲高髻。呼爲朝天髻。又製新曲曰。萬里朝天。未幾後主朝宋。崎嶇川陸。斯其驗矣。高祖自同光三年乙酉入蜀。至廣政二十八年乙丑國滅。父子二世。凡四十一年。五代詩話。昶令羅城上。盡種芙蓉。盛開四十里。語左右曰。古以蜀爲錦城。今觀之。眞錦城也。嘗夜同花蕊夫人避暑摩訶池上。作玉樓春。卽春曉曲也。漫叟詩話。楊元素作本事曲。記洞仙歌。冰肌玉骨。自清涼無汗。水殿風來暗香滿。繡簾開。一點明月窺人。人未寢。欹枕橫。欹鬟雲亂。起來攬素手。庭戶無聲。時見疎星渡河漢。試問夜如何。夜已三更。金波淡。玉繩低轉。細屈指。西風幾時來。又不道流年暗偷換。錢唐有一老尼。能誦後主詩。首章兩句。後人爲足其意。以填此詞。若溪漁隱叢話。東坡洞仙歌序。僕七歲時。見眉州老尼姓朱。忘其名。年九十餘。自言嘗隨其師入蜀主孟昶宮中。一日大熱。蜀主與花蕊夫人夜起避暑摩訶池上。作一詞。朱具能記之。今四十年。朱已死矣。人無知此詞者。獨記其首兩句云。冰肌玉骨自清涼。無汗暇日尋味。豈洞仙歌令乎。乃爲足之云。若溪漁隱曰。漫叟詩話所載本事曲云。錢唐一老尼。能誦後主詩首章兩句。與東坡洞仙歌序全然不同。當以序爲正也。野人閒

話後主時。城內人生三十歲。有不識米麥之苗。每春三月夏四月。多有遊花院及錦浦者。歌樂歌天。珠翠填咽。貴門公子。華軒彩舫。共賞百花潭。上至諸王功臣已下。皆各置林亭。異果名花。充溢其中。元費著器物諸。廣政十四年冬十月十五日。彭山縣副將領楊宮。獲銅印于江岸。印有六面。方各寸許。皆有篆文兩面。共通一竅。竅中三虛一實。其直可貫。其圓可規。六面篆文共八十二分。夾其竅六十均在四旁。各成文章。一面天國老君生萬民治中國外國人和。凡十五字。其相對一面云。老君授生輔天下國安平受道人長生凡十五字。又一面虛無自然明日月星辰光凡十字。其相對一面云。元女致和氣玉女致天醫凡十字。又一面上國僊師天師老君道成明天地政。凡十五字。其相對一面云。上召吾拜無爲大昊通天下治氣同。凡十五字。容齋三筆。成都石本諸經題云。廣政十四年。蓋孟昶時所鐫。邵氏聞見錄。昶舟過省州湖瀾渡。一宮嬪有孕。昶出之祝曰。若生子。孟氏尙存也。後果生子。今爲孟氏不絕。昶治蜀有恩。國人哭途之。至憐爲別去。因號曰蜀山。王。

避暑摩訶池上作

冰肌玉骨清無汗。水殿風來暗香暖。簾開明月獨窺人。欹枕釵橫雲鬢亂。起來瓊戶寂無聲。時見疎星渡河漢。屈指西風幾時來。只恐流年暗中換。

何 瓚

瓚。閩人。唐末舉進士及第。後唐莊宗爲太原節度使。辟爲判官。代知留守事。建號拜諫議大夫。明宗卽位。以瓚爲西川節度副使。後蜀孟知祥僭位。改瓚行軍司馬。卒。

五代史。初知祥在北京爲馬步軍都虞候。而瓚留守太原。

知祥以軍禮事贊，贊常繩以法。知祥初不樂，及贊爲司馬，猶勉待之甚厚。知祥反，罷贊司馬，置之私第。贊飲恨而卒。先贊常有蜀城書事詩末句云：到頭須卜林泉隱，自愧無能繼臥龍。後十年遂得篤疾。

書事

果決生涯向路中，西投知己話從容。雲遮劍閣三千里，水隔瞿塘十二峯。闊步文翁坊裏月，閑尋杜老宅邊松。到頭須卜林泉隱，自愧無能繼臥龍。

徐光溥

光溥蜀人事孟知祥爲觀察判官，知祥稱尊號，進翰林學士。後主昶時，拜中書侍郎同平章事。十國春秋：廣政十四年三月，帝宴于後苑，放士庶入觀俳優，有唱康老子者。帝顧李昊等問曲所由名，昊不能對。徐光溥曰：康老老而無子，故製此曲。張唐英曰：老子卽長安富家子，開元中拓落不事生業，好與梨園樂工游，一旦窮悴而卒。樂工嘆之，因爲此曲。又名曰得至寶。光溥蓋不知而妄對也。任臣按：樂府雜錄載康老子與國樂狎蕩，偶有一老嫗持舊錦褥貨，鬻乃以半千獲之，尋有波斯見之，驚曰：何處得此至寶？是冰蠶絲所織，夏月置座間，一室清涼，卽以千金酬之，還與國樂追歡。不經年蕩盡。康卒，樂工製此，亦曰得寶子。張氏似亦未詳。又本傳：光溥有辨才，遇事輒發，會李昊等疾之，後有議論，光溥熟睡而已。時號睡相。居無何，坐以豔詞挑前蜀安樂長公主，罷相卒。

題黃居寀秋山圖

居寀字伯鸞，荃季子也。工畫花竹翎毛。事後主爲翰林待詔，與荃同被恩寵。圖畫殿庭牆壁，宮闈屏障，不可勝紀。廣政十五年，後主命往葛仙山，回至彭州，棲真南軒，繪水石一堵，自未越西而畢。觀者嘆其

敏妙，又常奉後主命，與荃同畫秋山圖，以答江南信幣學士。徐光溥作秋山圖歌以美之。

天與黃筌藝奇絕。筆精迥感重瞳悅。連思潛通造化工。揮毫定得神仙訣。秋來奉詔寫秋山。寫在輕綃數幅間。高低向背無遺勢。重巒疊嶂何孱顏。目想心存妙尤極。研巧覈能狀不得。珍禽異獸皆自馴。奇花怪木非因植。崎嶇石磴絕遊蹤。薄霧冥冥藏半峰。娑蘿掩映迷仙洞。薜荔纍垂繳古松。屈原江上嬋娟竹。陶潛籬下芳菲菊。良宵祇恐鷓鴣啼。晴波但見鴛鴦浴。暮煙羃羃鏤村塢。一葉扁舟橫野渡。颯颯白蘋欲起風。黯黯紅蕉猶帶雨。曲沼芙蓉香馥郁。長汀蘆荻花叢蔚。雁過孤峰帖遠青。鹿傍小溪飲殘綠。秋山秀兮秋江靜。江光山色相輝映。雪迸飛泉濺釣磯。雲分落葉擁樵徑。張璪松石徒稱奇。邊鸞花鳥何足窺。白旻鷹逞凌風勢。薛稷鶴諍警露姿。方原畫山空巉岩。峭壁枯槎人見嫌。孫位畫水多洶湧。驚湍怒濤人見恐。若教對此定妍媸。必自伏膺懷愧恐。再三展向冕旒側。便是移山回礪力。大李小李滅聲華。獻之愷之無顏色。髣髴綸渭水濱。吾皇覩之思良臣。依稀荷鐔傳巖野。吾皇覩之求賢者。從茲仄展復懸旌。宵衣旰食安天下。才當老人星應候。願與南山俱獻壽。微臣稽首貢長歌。丹青景化同天和。

同劉侍郎詠筭

迸出班犀數十株。更添幽景向蓬壺。出來似有凌雲勢。用作丹梯得也無。

劉義叟

義叟後蜀翰林學士。

十國春秋。徐光溥官學士時。常與侍郎劉義叟分直。賦庭中筭詩。義叟以光溥本蜀士。語涉刺譏。光溥遂切齒。由是終不相協。世或病其隘云。

同徐學士詠筭

徐徐出土非人種。枝葉難投日月壺。爲是因緣生此地。從他長養譬如無。

劉義度

義度後蜀工部侍郎。

感懷詩

昨日方鬢髻。如今滿領髯。紫閣無心戀。青山有意潛。

李如實

如實初事梁末帝。以直諫謫鄭州。再貶汝州副使。梁亡。入成都。後蜀孟知祥知其賢。拜戶部侍

郎卒。

十國春秋。末帝嗣位。一日顧如實曰。卿知天子由誰補乎。如實對曰。人臣所補。末帝曰。朕地據三河。位尊萬有。大實補之。豈人臣可得主邪。如實曰。陛下身在深宮。居安思危。臨泉履冰。得失頃刻。豈是天補者哉。末帝怒曰。惡老漢不

足與語。貶汝州。如實至汝州。自製一臥車。常于車中置酒一瓢。琴一具。書數卷。命小僮十餘輩。載入衙衛。四顧朗吟。觀者多竊笑焉。久之。梁無內召意。如實心頗不平。裁落韻詩以譏之。

落韻詩

炎蒸不可度。賴爾生涼風。在物成非器。於人還有功。殷勤九夏內。寂寞三秋中。想君應有語。弃我如秋扇。

顧 豐

曼前蜀時給事內庭擢茂州刺史後事孟知祥累遷至太尉

十國春秋前蜀通正時曼以小臣給事內廷會雋驚鳥翔摩訶池上曼作詩刺之禍幾不

測詩云昔日曾看瑞應圖百祥瑞不如摩訶池上分明見子細看來是那鴟又云曼善小辭有醉公子曲爲一時翫稱尤善恢諧常于前蜀時見錄武秩者多拳勇之大戲造武舉以譏之人以爲滑稽云渠曰大順年侍郎李吒叱下進士及第三十餘人姜瓖子張打胸李嗑咀李破肋李吉了樊忽雷王號麗郝牛矢陳波斯羅蠻子等試亡命山澤賦到處不生草詩花間集顧曼醉公子詞云哀柳數聲蟬魂消似去年陳鵬伯愛之擬作一絕句云擁被忽聽門外雨山中又作去年秋化甚脫

醉公子曲

漠漠秋雲澹紅藕香侵檻枕倚小山屏金鋪向晚扃睡起橫波慢獨望情何限衰柳數聲蟬魂銷似去年岸柳垂金線雨晴鶯百轉家住綠楊邊往來多少年馬嘶芳草遠高樓簾半卷歛袖翠蛾攢相逢爾許難浣溪沙曲

春色迷人恨正賒可堪蕩子不還家細風輕露著梨花簾外有情雙燕颺檻前無力綠楊斜小屏狂夢極天涯露白蟾明又到秋佳期幽會兩悠悠夢牽情役幾時休記得泥人微歛黛無言斜倚小書樓暗思前事不勝愁

春曉曲

月照玉樓春漏促颯颯風搖庭砌竹夢驚鴛被覺來時何處管弦聲斷續惆悵少年遊冶去枕上兩蛾攢

細綠曉鶯簾外語花枝。背帳猶殘紅蠟燭。
柳映玉樓春日晚。雨細風輕煙草軟。畫堂鸚鵡語雕籠。金粉小屏猶半掩。香滅繡幃人寂寂。倚檻無言愁思遠。恨郎何處縱疎狂。長使含顰眉不展。
月皎露華窗影細。風送菊香黏繡袂。博山爐冷水沈微。惆悵金閨終日閉。嬾展羅衾垂玉筩。羞對菱花簪寶髻。良宵好事枉教休。無計那他狂耍堵。
拂水雙飛來去燕。曲檻小屏山六扇。春愁凝思結眉心。綠綺嬾調紅綿薦。話別情多聲欲戰。玉筩痕留紅粉面。鎮長獨立到黃昏。卻怕良宵頻夢見。

蔣詒恭

詒恭

一作貽恭
一作詒恭

江淮人。唐末入蜀。孟知祥時。官大井縣令。

野人閑話。巴蜀三紀以來。藝能之士。書畫者衆矣。沙門墨戲。學李陽冰篆。道士張昭嗣。效柳公權書。

工部元員外昭繼。仿韓擇木八分。皆杜光庭門人也。僧曉轡改張芝草書。黃少監筆摹邊鸞花竹。盧士滕昌祐。擬梁廣花草。野人張道隱學張璪松石。相國李昊爲著名。李司儀文才繼嗣立本寫真書。畫當代野人平生讀老莊書。如圖龍之真形。飄飄然雲雨氣。有蜿蜒之勢。撰龍譜筆訣三卷。彭州倅鄭昭請畫龍于州西門太山府君祠。其夕三更。風雨大作。稱詒恭留題詩云云。全唐詩話詒恭善詠詩。有僞蜀給事王允光短小。詒恭嘲之云。厥父元非道郡奴。允光何事太侏儒。可中與箇皮棍著。擊得天王左腳麻。有刑院杖直官張進嘗誦之。允光以事奏。真極法。後見進索命死。又詠金剛云。楊眉斗目惡精神。捏合將來恰似真。剛被時流借拳勢。不知身自是泥人。又詠驅背子云。出得門來背拄天。同行難可與差肩。若教倚向閑窗下。

恰似登樓不著弦。又詠安仁宰簿云。安仁縣令好誅求。百姓脂膏滿面流。半破磁缸成醋酒。死牛腸肚作饅頭。帳生歲取餐三頓。鄉老盤中飽五甌。半醉半醒齊出縣。共傷塗炭不勝愁。又五門街望有題云。我是開國十餘年。一輩超升炙手歡。閣向五門樓下望。衙官騎馬使衙官。又謝郎中惠茶云。三斤綠茗賜詒恭。一種煩瑣事不同。想料腸懷無答處。披毛戴角謝郎中。又詠蝦蟆云。坐臥兼行總一般。向人努眼太無端。欲知自己形骸小。試就蹄涔照影看。鑑戒錄。蔣詒恭本江淮人。無媚世之語。有詠人之才。孟祖嶺蜀。搜訪遺材。蔣亦遇時。數蒙見用。唐詩紀事。蔣詒恭江淮人。唐末入蜀。巧於譏刺。蜀人畏之。孟氏時卒。官止令佐。夢瑱言。蔣詒恭好嘲詠。類以此痛遭夏楚。近聞官至令佐而卒。十國春秋。蔣詒恭蘇州人。性耿直。有逸才。永平間。流落入四川。每有吟咏。輒涉譏刺。高祖末年。臣僚多尙權勢。侈放無節。詒恭因作詩諷之。高祖見詩大喜。曰。敢言之士也。特授名山令。又善畫事。賜銀緋。豈詒恭即貽恭字畫相譌邪。抑別有一貽恭也。又或云王。或云孟。存以闕疑。

題張道隱太山祠畫龍

世人空解競丹青。惟子通元得墨靈。應有鬼神看下筆。豈無風雨助成形。威疑噴浪歸滄海。勢欲擎雲上杳冥。靜閉綠堂深夜後。曉來簾幕似聞腥。

詠蠶

辛勤得繭不盈筐。燈下纈絲恨更長。著處不知來處苦。但貪衣上繡鴛鴦。

令狐嶠

嶠仕孟知祥。父子官至祕書監。

十國春秋。嶠工吟咏。兼擅敏才。口占詩句。多所嘲諷。好事者時傳其詩。一日遇明慶節散後。贈左右兩街命服僧元詩云。

明慶節散後。贈左右兩街命服僧元。

卻羨僧門與道門。無年今日紫衣新。可憐州縣祁評事。盡向荷衣老卻身。

向瓚

瓚初事孟知祥。爲行軍司馬。後累加僕射。十國春秋。瓚亦以諛詞著名。常有詠乘煙觀蔣諫師。將狀貌甚偉。不類婦人。瓚詩頗嘲之。一時絕倒。詩云。

乘煙觀蔣諫師

怪得盤跚不上昇。白雲蹋綻紫雲崩。龍腰鳳背猶嫌軟。須問麻姑借大鵬。

楊鼎夫

鼎夫成都人。舉進士。孟知祥時。爲匡聖指揮使。安思謙幕吏。

五代詩話。鼎夫嘗遊青城山。過冕江。中流遇暴風。船抵巨石。覆洪濤間。同儕盡沒。鼎夫似

有物扶助。達岸有老人以杖接引。鼎夫未及致謝。旋失所之。因作詩以記之云。

記事

青城山峭。皂江寒。欲渡當時作等閑。棹逆狂風趨近岸。舟逢怪石碎前灣。手攜弱杖倉皇處。命出洪濤頃刻間。今日深恩無以報。令人羞說雀銜環。

安守範

守範。後蜀彭州刺史。思謙之子。

天台禪院聯句

守範。定遠推官楊鼎夫。懷遠軍巡官周述。眉州判官李仁肇。

偶到天台院。因逢物外僧。守範忘機同一祖。出語離三乘。鼎夫樹老中庭寂。窗虛外境澄。述片時松影下。聯續百千燈。仁肇

勾龍逢

逢蜀人

十國春秋。孟知祥入梓州。舉子勾龍逢獻詩云。孟知祥嘉納之。

獻賀捷詩

唇齒論交歲月長。豈其率意忽顛狂。元戎統領三軍戰。巨孽奔衝一陣亡。莫訝潼江剛入寇。都緣錦浦合興王。武功蓋世光前後。堪向青編萬古揚。

全五代詩卷五十八

後蜀

毛文錫

文錫字平珪。南陽人。唐太僕卿龜範子。年十四。登進士第。後事王蜀。爲翰林學士承旨。遷禮部尚書。內樞密使。歷文思殿大學士。拜司徒。貶茂州司馬。王衍降唐後。復事孟蜀。爲後主狎客。所著有前蜀紀事二卷。茶譜一卷。

堯山堂外紀。毛文錫。韓琬。龐虔辰。閻選。歐陽炯五人。以工小辭。供奉後主。時號五鬼。十國春秋。文錫尤工豔語。所撰巫山一斷雲詞。當世傳咏之。詞曰。雨霽巫山。

上雲輕映碧天。涼風吹散。又相連。十二晚峯前。暗湮啼猿樹。高簾過客船。朝朝暮暮。楚江邊。幾度降神仙。又毛文藝。文錫同母弟。有文才。善制語。天漢間。歷官翰林學士。坐兄文錫黨。貶榮經尉。久之。復晉秩至兵部侍郎。著有西園集十卷。昌城後寓集十五卷。復纂成通後麻制一卷。東璧出言三卷。苔溪漁隱叢話復齋漫錄云。余讀楊巨源詩。江邊楊柳麴塵絲之句。不知所本。後讀劉夢得楊柳枝詞云。鳳閣輕遮翡翠幃。龍池遙望麴塵絲云云。乃知巨源取此。今集作綠烟絲非也。苔溪漁隱曰。汪彥章詩云。垂垂梅子雨。細細麴塵波。毛文錫詞云。鶯央對浴。銀塘暖。水面蒲梢短。垂楊低拂麴塵波。則麴塵又可於水言之也。

閨怨

休相問。怕相問。相問還添恨。春水滿塘生。鵝鵝還相趁。昨夜雨霏霏。臨朝寒一陣。偏憶戍樓人。久絕邊庭信。

七夕曲

七夕年年信不違。銀河清淺白雲微。蟾光鵲影伯勞飛。每恨螭蛄憐婺女。幾回嬌妬下鴛機。今宵嘉會兩依依。

韓琮

琮字成封。孟蜀時人。事後主爲狎客。

調元按唐音茂纂紀事云。琮大中中嘗爲中書舍人。又爲觀察。待將士不以禮爲都將。石載順所逐。楊用修以爲孟蜀時人誤。考十國春秋王衍常

以重陽日宴羣臣于宣華苑。夜半酒酣。唱韓琮柳枝詞。宋光甫欲以諷爲諫。遂詠胡曾不覺錢塘江上月。一宵西送越兵來之詩以誚之。則韓琮應爲前蜀之前人。然楊用修斷爲孟蜀時人。必有所本。胡震亨著戊籤引以爲誤。不知何據。并識於此考。以俟。

公子行

紫袖長衫色。銀蟬半臂花。帶裝盤水玉。鞍繡坐雲霞。別殿承恩澤。飛龍賜渥洼。控羅青裏轡。鏤象碧薰葩。意氣傾歌舞。闌珊走鈿車。袖郭雲縹緲。釵轉鳳欹斜。珠卷迎歸箔。紅籠暈醉紗。唯無難夜日。不得似仙家。

春愁

金烏長飛玉兔走。青髻長青古無有。秦娥十六語如弦。未解貪花惜楊柳。吳魚嶺雁無消息。水誓蘭情別來久。勸君年少莫遊春。煖風遲日濃於酒。

興平縣野中得落星石移置縣齋

的的墮芊芊。蒼茫不記年。幾逢疑虎將。應逐犯牛仙。擇地依蘭畹。題詩問錦牋。何時成五色。卻上女媧天。

詠牡丹未開者

殘花何處藏。盡在牡丹房。嫩蕊包金粉。重葩結繡囊。雲凝巫峽夢。簾閉景陽粧。應恨年華促。遲遲待日長。

秋晚信州推院親友或責無書卽事寄答

官信安仁拙。書非叔夜慵。謬馳驄馬傳。難附鯉魚封。萬里勞何補。千年運忝逢。不量橫草力。虛慕入雲縱。潔水空澄鑑。持鉛亦礪鋒。月寒深夜桂。霜凜近秋松。憲摘無逃魏。冤申得夢馮。問狸將挾虎。殲蕞敢虞蜂。商吹移砧調。春華改鏡容。歸期芳畹積。愁思暮山重。仙鼠猶驚燕。莎雞欲變蛩。唯應碧湘浦。雲落及芙蓉。

涼西卽事

秋草河蘭起陣雲。涼州唯向管絃聞。豺狼毳幕三千帳。貔虎金戈十萬軍。候騎北來驚有說。戍樓西望悔爲文。昭陽亦待平安火。誰握旌旗不見勦。

穎亭

穎上新亭瞰一川。幾重舊址敞幽關。寒聲北下當軒水。翠影西來撲檻山。遠目靜隨孤鶴去。高情常共白雲閑。知君久負巢由志。早晚相忘寂寞間。

題商山店

商山驛路幾經過。未到仙娥見謝娥。紅錦機頭拋皓腕。綠雲鬟下送橫波。佯嗔阿母留賓客。暗爲王孫換綺羅。碧澗門前一條水。豈知平地有天河。

題圭峰下長孫家林亭

趙國林亭二百年。綠苔如毯葛如煙。閑期竹色搖霜看。醉惜松聲枕月眠。出樹圭峰寒壓坐。入籬沙瀨碧流天。明知富貴非身物。莫爲金章墮地仙。

風

競持飄忽意何窮。爲盛爲衰半不同。偃草喜逢新雨後。鳴條愁聽曉霜中。涼飛玉管來秦甸。暗裊花枝入楚宮。莫見東西使無定。滿帆還有濟川功。

雨

陰雲拂地散絲輕。長得爲霖濟物名。夜浦漲歸天塹闊。春風洒入御溝平。軒車幾處歸頻溼。羅綺何人去欲驚。不及流他荷葉上。似珠無數轉分明。

雲

輕惹離愁靄落暉。如車如蓋早依依。山頭觸石應常在。天際從龍自不歸。莫向隙窗籠夜月。好來仙洞溼行衣。春風淡蕩無心後。見說襄王夢亦稀。

霞

應是行雲未擬歸。變成春態媚晴暉。深如綺色斜分開。碎似花光散滿衣。天際欲銷重慘淡。鏡中閑照正依稀。曉來何處低臨水。無限鴛鴦妬不飛。

露

長隨聖澤墮堯天。濯遍幽蘭葉葉鮮。纔喜輕塵銷陌上。已愁新月到堦前。文騰要地成非久。珠綴秋荷偶得圓。幾處花枝抱離恨。曉風殘月正潸然。

牡丹

桃時杏日不爭濃。葉帳陰成始放紅。曉豔遠分金掌露。暮香深惹玉堂風。名移蘭杜千年後。貴擅笙歌百醉中。如夢如仙忽零落。暮霞何處綠屏空。

詠馬

曾經伯樂識長鳴。不似龍行不敢行。金埒未登嘶若是。鹽車猶駕瘦何驚。難逢王濟知音癖。欲就燕昭買駿名。早晚飛黃引同輩。碧雲天上作鸞鳴。

涼州詞

樹發花如錦。鶯啼柳若絲。更遊歡宴地。悲見別離時。

晚春江晴寄友人

晚日低霞綺。晴山遠畫眉。春青河畔草。不是望鄉時。

暮春澹水送別

綠暗紅稀出鳳城。暮雲宮闕古今情。行人莫聽宮前水。流盡年光是此聲。

謝云。人物有盡。流水無窮。自唐有宮闕以來。不知經幾年。過幾人。而宮前流水

只此如故。

駱谷晚望

秦川如畫柳如絲。去國還鄉一望時。公子王孫莫來好。嶺花多是斷腸枝。

二月二日遊洛源

舊苑新晴草似苔。人還香在踏青迴。今朝此地成惆悵。已後逢春更莫來。

楊柳枝詞二首

梁苑隋隄事已空。萬條猶舞舊春風。那堪更想千年後。誰見楊花入漢宮。
枝鬪纖腰葉鬪眉。春來無處不如絲。霸陵原上多離別。少有長條拂地垂。

鹿虔扈

虔扈

一作虔扈

事孟蜀。歷官至檢校太尉。

十國春秋。虔扈思越人辭。有雙帶繡窠盤錦荐。淚侵花暗香消之句。辭家推爲絕唱。詩史。虔扈王小詞。傷蜀亡。詞云。金鎖重門荒苑靜。綺窗愁對秋空。

翠華一去。寂無蹤。玉樓歌吹聲斷。已隨風。烟月不知人事改。夜闌還照深宮。藕花相向野塘中。暗傷亡國清露泣香紅。

送女道士

洞裏愁空結。人間信莫尋。竹疎齋殿迴。松密藥壇陰。

閨選

選孟蜀時布衣。人稱爲閨處士。

十國春秋。選善小詞。有臨江仙詞云。甚深殿。香霧冷。風殘。又云。猿啼明月照空灘。爲人傳語。

浣溪沙曲

寂寞流蘇冷繡茵。倚屏山枕惹香塵。小庭花露泣濃春。劉阮信非仙洞客。嫦娥終是月中人。此生無路訪東鄰。

雜詞

雲鎖嫩黃煙柳細。風吹紅帶雪梅殘。光影不勝閨閣恨。行行坐坐黛眉攢。愁鎖黛眉煙易慘。淚飄紅臉粉難勻。憔悴不知緣底事。遇人推道不宜春。

歐陽炯

炯

一作迴。一作炯。

益州華陽人。少事王衍。爲中書舍人。孟蜀廣政中。拜翰林學士。歷門下侍郎平章事。

後從昶歸宋。

唐音戊籤。炯性坦率。守儉素。好爲歌詩。嘗擬白氏諷諫五十篇獻昶。昶嘉納之。十國春秋。炯善文章。尤工詩辭。唐張素卿常繪十二真人像。世稱其妙。安思謙得素卿本。乃于明慶節上獻後主。命炯爲之贊。裝

漢成帙其見重多此類也。爛著有武信軍衙記。花間集序傳世。序曰。鐵玉雕瓊。擬化工而過巧。葳花明葉。發春豔以爭鮮。是以唱雲謠則金母詞清。挹霞醴則穆王心醉。名高白雪。聲聲而自合。鸞歌響遏青雲。字字而偏諧鳳律。楊柳大堤之句。樂府相傳。芙蓉曲渚之篇。豪家自製。莫不爭高門下。三千玳瑁之簪。競宮樓前。數十珊瑚之樹。則有綺筵公子。繡幌佳人。遮葉藏之花。殘文抽麗錦。舉纖纖之玉指。拍案香檀。不無清絕之辭。用助嬌嬈之態。自南朝之宮體。扇北里之倡風。何止言之不文。所謂秀而不實。有唐已降。率土之濱。豪家之香徑。春風寧越。豔處處之紅樓。夜月自鎖。姮娥在明皇朝。則有李太白應制。清平樂詞四首。近代溫飛卿。復有金筌集。邇來作者。無愧前人。今衛尉少卿趙崇祚。以拾翠洲邊。自得羽毛之異。織綃泉底。蜀殊機杼之功。廣會樂寶時。延作論。因集近來詩客曲子詞五百首。分爲十卷。以爛粗預知音。辱請命題。仍爲序引。乃命曰。花間集。將使西園英哲。用資羽蓋之歡。南國嫵媚。休唱蓮舟之引。文故廣政三年作也。又小辭十七章。人亦時時稱道之。漁父歌尤爲辭家所唱和。全唐詩話。爛有南鄉子詞最工。詞云。嫩草如煙。石榴花發海南天。日暮江亭春影漲。鴛鴦浴。水遠山長。音不足。畫舸停桡。槿花籬外竹橫橋。水上遊人沙上女。回顧笑。指芭蕉林裏住。岸遠沙平。日斜歸路晚霞明。孔雀白鸞金翠尾。臨水認得行人驚不起。洞口誰家。木蘭船繫木蘭花。紅袖女郎相引去。遊南浦。笑倚春風相對語。二八花鈿。胸前如雪臉如蓮。耳墜金環穿瑟瑟。霞衣窄。笑倚江頭招遠客。路入南中。桄榔葉暗蓼花紅。兩岸人家微雨後。收紅豆。樹底纖纖抬素手。袖斂絞綃。采香深洞笑相邀。藤枝枝頭。蘆酒滴。鋪葵席。豆蔻花間。趁晚日。翡翠鸞鴦。白蘋香裏小沙汀。島上陰陰秋雨色。蘆花撲。數隻漁船何處宿。韻語陽秋。爛有賦棋句云。古人重到今人愛。萬局都無一局同。堯山堂外紀。爛事昶時。號五鬼之一。曾約同僚納涼於寺。寺僧可朋作耘田鼓歌以刺之。遂撤飲。

春曉曲

兒家夫婿心容易。身又不來書不寄。閑庭獨立烏關關。爭忍拋奴深院裏。悶向綠紗窗下睡。睡又不成愁

已至今年卻憶去年春同在水蘭花下醉

日照玉樓花似錦。樓上醉和春色寢。綠楊風送小鶯聲。殘夢不成離玉枕。堪愛晚來韶景甚。寶柱秦箏方再品。青蛾紅臉笑來迎。又向海棠花下飲。

春早玉樓煙雨夜。簾外櫻桃花半謝。錦屏香冷繡衾寒。招恨憶君無計舍。侵曉鵲聲來砌下。鸞鏡殘妝紅粉罷。黛眉雙點不成描。留待玉郎歸日畫。

赤棗曲

夜悄悄。獨熒熒。金爐香盡酒初醒。春睡起來回雪面。含羞不語倚雲屏。蓮臉薄。柳眉長。等閑無事莫思量。每一見時明月夜。損人情思斷人腸。

漁父詞

擺脫塵機上釣船。免教榮辱有流年。無繫絆。沒愁煎。須信船中有散仙。風皓寒溪照膽明。小君山上玉蟾生。荷露墜。翠煙輕。撥刺游魚幾箇驚。

浣溪沙曲

落絮殘鶯半日天。玉柔花醉只思眠。惹窗映竹滿爐煙。獨掩畫屏愁不語。斜欹瑤枕髻鬟偏。此時心在阿誰邊。相見休言有淚珠。酒闌重得叙歡娛。鳳屏鴛枕宿金鋪。蘭麝細香聞喘息。綺羅纖縷見肌膚。此時還恨薄情無。

貫休應夢羅漢畫歌

黃休復益州名畫錄云。貫休能詩善書畫。王氏建國時。居蜀中龍華寺。縱筆畫水墨羅漢一十六身。并一佛二大士。巨石紫雲。枯松帶墓。諸古貌與他人畫不同。或云夢中所覩。覺後圖之。謂之應

夢羅漢。蜀主宣入內。歎其筆跡狂逸。供養經月。卻令付院中。燭時在翰林。曾觀之。贈以歌。

西嶽高僧名貫休。孤情悄拔凌清秋。天教水墨畫羅漢。魁岸古容生筆頭。時拊大娟泥高壁。閉目焚香坐禪室。忽然夢裏見真儀。脫下袈裟點神筆。高握節腕當空擲。悉窅毫端任狂逸。逡巡便是兩三軀。不似畫工虛費日。怪石安排拂嵌復。枯真僧列坐連跏趺。形如瘦鶴精神健。頂似伏犀頭骨竊。倚松根。傍巖縫。曲錄腰身長欲動。看經弟子擬聞聲。瞋睡山童疑有夢。不知夏臘幾多年。一手搗頤偏袒肩。口開或若其人語。身定復疑初坐禪。案前臥象低垂鼻。崖畔遊猿斜展臂。芭蕉花裏刷輕紅。苔蘚文中暈深翠。硬筇杖。矮松床。雪色眉毛一寸長。綳開梵夾兩三片。線補衲衣千萬行。林間亂葉紛紛墮。一印殘香斷煙火。皮穿木屐不曾拖。箴織蒲團鎮長坐。休公休公。逸藝無人加。聲譽喧喧遍海涯。五七字句一千首。大小篆書三十家。唐朝歷歷多名士。蕭子雲兼吳道子。若將書畫比休公。只恐當時浪生死。休公休公。始自江南來入秦。于今到蜀無交親。詩名畫手皆奇絕。覩你凡人爭是人。瓦棺寺裏維摩詰。舍衛城中辟支佛。若將此畫比量看。總在人間爲第一。

題景煥畫應天寺壁天王歌

僖宗時。會稽處士孫位。隨駕至蜀。於應天寺門左壁上。畫天王一座。筆勢狂縱。三十餘年。無有敵者。景煥善書畫。與燭爲忘形交。一日同遊茲寺。畫右壁天王以對之。燭爲歌行一

篇以紀。有草書僧夢龜書之。廊

壁上成都人號爲應天三絕。

錦城東北黃金地。故跡何人興此寺。白眉長老重名公。曾識會稽山處士。寺門左壁圖天王。威儀部從來何方。鬼神恠異滿壁走。當簷颯颯生秋光。我聞天王分理四天下。水晶宮殿琉璃瓦。綵仗時驅狻猊裝。金鞭頻策騏驎馬。毗沙大像何光輝。手擎巨塔凌雲飛。地神對出寶餅子。天女倒披金縷衣。唐朝說著名公畫。周昉毫端善圖寫。張僧繇是有神人。吳道子稱無敵者。奇哉妙手傳孫公。能於此地留神蹤。斜窺小鬼怒雙目。直倚越狼高半臂。寶冠動總生威容。趨跼左右來傾恭。臂橫鷹爪尖纖利。腰纏虎皮斑剝紅。飄飄但恐入雲中。步驟還疑歸海東。蟒蛇拖得渾身墮。精魅搗來雙眼空。當時此藝實難有。鎮在寶坊稱不朽。東邊畫了空。西邊留與後人教敵手。後人見者皆心驚。盡爲名公不敢爭。誰知未滿三十載。或有異人來問生。匡山處士名稱朴。頭骨高奇連五嶽。曾持象簡累爲官。又有蛇珠常在握。昔年長老遇奇蹤。今日門師識景公。興來便請泥高壁。亂搶筆頭如疾風。逡巡隊仗何顛逸。散漫奇形皆湧出。交加器械滿虛空。兩面或然如鬪敵。聖王怒色覽東西。劍刃一揮皆整齊。腕頭獅子咬金甲。腳底夜叉擎絡鞵。馬頭壯健多筋節。烏背彎環如屈鐵。遍身蛇虺亂縱橫。透額觸髅乾子裂。眉竊眼豎髮如錐。恠異令人不可知。科頭臣卒欲生鬼。半面女郎安小兒。況聞此寺初興置。地脈沈沈當正氣。如何請得二山人。下筆成成千古事。君不見明皇天寶年。畫龍致雨非偶然。包含萬象藏心裏。變現百般生眼前。後來畫品列名賢。唯此二人堪比

肩人間是物皆求得。此樣欲於何處傳。嘗憂壁底生雲霧。揭起寺門天上去。

大遊仙詩

赤城霞起武陵春。桐柏先生解守真。白石橋高曾縱步。朱陽館靜每存神。囊中隱訣多仙術。肘後方書濟俗人。自領蓬萊都水監。只憂滄海變成塵。

楊柳枝

軟碧搖煙似送人。映花時把翠蛾嚬。青青自是風流主。漫颯金絲待洛神。

歐陽彬

彬字齊美。衡州人。炯之弟。前蜀時。官翰林學士。充唐國通好使。後歸孟知祥。累官尚書左丞。出

爲寧江軍節度使。廣政十三年卒。

十國春秋。彬家世爲縣吏。至彬特好學。工于辭賦。楚武穆王之有湖南也。彬以所著詣府求見。掌客吏索賄始爲通。彬恥以私進。竟不予。掌客擲名紙于地曰。

安有吏人子。欲干謁王侯邪。彬深恨之。因落魄湖南市中。歌姬酒徒。無所不狎。有歌伎瑞卿者。慕其才。延致于家。瑞卿故歲時供奉武穆王。彬乃作九州歌授之。俾當筵而奏。王竟不之聞。彬嘆曰。天下分裂之際。卒徒斷義。咸能自奮。我何負而至此乎。居頃之。四川圖綱將發。得歌伎所分寶。求爲綱吏僕夫。綱吏許之。遂入成都。獻萬里朝天賦。前蜀後主大悅。擢爲學士。乾德初。答聘唐使。頗能得二國歡心。王氏亡。復歸高祖。廣政初。後主以爲嘉州刺史。彬喜曰。青山綠水中。爲二千石。作詩飲酒。稱風月主人。豈不佳哉。既至夔州。寓書楚文昭王。敘疇昔入蜀之山。且以宗族爲托。文昭王得書大慙。悉除彬親友賦役。凡士無賢不肖。進謁盡加賓禮。彬之力也。彬雅有風儀。爲文詞切而理直。竟以是遇。南部新書。彬初投謁馬殷。知客樊姓者。

索賄不得。不與通。後爲九州歌千之。又不問。有句云。無錢將乞。變知客。名婦生毛。不爲通。遂入蜀。郡開雅談。范攄吳人。撰
雲溪友議。嘗有子七歲。作隱者詩云。掃葉隨風便。澆花趁日陰。方干聞之曰。此可入室。又作夏景詩云。閒巖生不雨。病葉落
非秋。干曰。必不壽。果卒。後彬有子稚齒。作田父詩云。桑柘殘陽裏。兒
孫落葉中。廖凝見之曰。可惜。天才與范氏之子同。亦俱不壽。尋亦卒。

生查曲

竟日晝堂歡。入夜重開宴。翦燭蠟煙香。促席花光顫。待月得華來。滿院如鋪練。門外簇驂騑。直待更深散。

全五代詩卷五十九

後蜀

幸寅遜

寅遜夔州雲安監人仕後主起家茂州錄事參軍遷新都令已又拜司門郎中知制誥中書舍人出知武信軍府加史館修撰改給事中與修前蜀書未幾遷翰林學士加工部侍郎判吏部三銓事領簡州刺史國亡隨後主降宋授右庶子罷職年九十餘尚有仕進意治裝赴闕未登路而卒

楊伯崑六帖補孟蜀幸寅遜夢掌中生草不絕掌制草數年吟窗雜錄岷山云苦教作鎮居中國爭得泥金在泰山吟柳云纔聞暖律先偷眼既待和風始展眉又事文類聚咏梨云嚼處春冰敲齒冷嚙時雪液沃心寒咏雪云深粧玉瓦平無攏亂拂蘆花細有聲又日回禽影穿疎木風遞猿聲入小樓皆佳全唐詩話遜奉親旨書桃符詩云新年納餘慶嘉節號長春及蜀亡宋以參知政事呂餘慶知益州長春乃太祖誕聖節名俱成讖語

雲

因登巨石知來處勃勃元生綠蘚痕靜卽等閑藏草木動時頃刻遍乾坤橫天未必朋元惡捧日還曾瑞至尊不獨朝朝在巫峽楚王何事謾勞魂

毛熙震

熙震蜀人孟昶時官至秘書監

全唐詩話熙震有清平樂詞爲人傳誦詞云含愁獨倚閨幃玉爐煙斷香微正是銷魂時節東風滿院花飛

浣溪沙曲

春暮黃鶯下砌前。水精簾影露珠懸。綺霞低映晚晴天。弱柳萬條垂翠帶。殘紅滿地碎香鈿。蕙風飄蕩散輕烟。花樹香紅烟景迷。滿庭芳草綠萋萋。金鋪閑掩繡簾低。紫燕一雙嬌語碎。翠屏十二晚峯齊。夢魂消散醉空閒。雲薄羅裙綬帶長。滿身新裊瑞龍香。翠鈿斜映豔梅妝。佯不覩人空婉約。笑和嬌語太猖狂。忍教牽恨暗形相。半醉凝情臥繡茵。睡容無力卸羅裙。玉籠鸚鵡厭聽聞。慵整落釵金翡翠。象梳欹鬢欲生雲。錦屏綃幌麝烟薰。

張立

立孟蜀時人

十國春秋立雅善吟咏性機直無忌諱後主常於羅城上徧植芙蓉每至秋間四十里盡鋪錦繡高下相照立作詩以嘲風七月爲刺詩云云及廣政末朝政已亂立又作詩規諷云云國人稱爲詩諫

詠芙蓉

四十里城花發時。錦囊高下照坤維。雖粧蜀國三秋色。難入豳風七月詩。

再詠芙蓉

去年今日到成都。城上芙蓉錦繡舒。今日重來舊遊處。此花憔悴不如初。

何光遠

光遠字輝夫。東海人。好學嗜古。廣政初。官普州軍事判官。撰鼎公眞龜記。嘗著鑑誠錄十卷。廣

政雜錄三卷。

全唐詩話。光遠與明月潭龍女冥會。贈答有詩數首云云。

傷春吟

簷上簷前燕語新。花開柳發自傷神。誰能將我相思意。說與江隈解佩人。

答龍女詩

澹蕩春光物象饒。一枝瓊豔不勝嬌。若能許解相思佩。何羨星天渡鵲橋。

催妝詩二首

玉漏涓涓銀漢清。鵲橋新架路初成。催妝既要裁篇咏。風吹鸞歌早會迎。
寶車輾駐彩雲開。誤到蓬萊頂上來。瓊室既登花得折。永將凡骨逐風雷。

李堯夫

堯夫。蜀梓潼山人。

遺珠。歐陽公愛王君玉燕詞。烟徑掠花飛遠。曉窗驚夢語匆匆。梅聖俞以爲不若李堯夫花前語。建春猶吟。江上飛高雨乍晴。岷山異事。堯夫吟咏尙譏刺。謁蜀相李昊。昊戲曰。何名之。背時

也。堯夫厲色對曰。甘作堯時夫。不樂蜀中相。因是爲昊所擯。知蜀主國柄墜素。吟苦熱詩云。炎暑鬱蒸無處避。涼風消息幾時來。古今詩話。太祖采聽明遠。邊事纖悉必知。有使者自蜀還。上問劍外有何事。對曰。但聞成都滿城誦李山長苦熱詩云云。上曰。蜀民望王師也。又堯夫贈滕郎中云。方外共推爲道友。關中獨自占詩家。調元按堯夫盆池詩。又見張翥集。相傳堯夫詩係向外疑無地。其中別有天。未見全什。不知孰是。

盆池

圓內陶化功。外絕衆流通。選處離松影。穿時減葯叢。別疑天在地。長對月當空。每使登門客。烟波入夢中。

卞震

震成都人。蜀進士。景時爲渝州判。蜀平入宋。

雅言雜系。震嘗吟卽事句云。雨壁長秋菌。風枝落病蟬。又老館。搗瘦影寒木。凭吟身春日偶題云。詩債到春無處避。離愁當醉。

暫時無卽事云。茶香解睡磨錦裘。山色牽懷著屐登。歷代譜震句云。空囊萬里客。斜月一床寒。

岑公巖

一作馬冉詩

南溪有仙澗。咫尺非人間。泠泠松風下。日暮空蒼山。

劉保乂

保乂青州人。廣政初。官戶部郎中。充諸王宮侍讀。

九國志作劉保義。又云轉給事中。人以其誤諸王。喘方不撓。稱爲劉侍讀。

閨夜曲

深秋更漏長。滴盡銀臺燭。獨步出幽閨。月眇波澄綠。暮荷風乍觸。一對鴛鴦宿。虛擢玉釵驚。驚起還相續。

韋穀

殺仕知祥父子累遷監察御史陞尚書

十國春秋報少文藻夢中得軟羅繡巾由是才思益進常輯唐人詩千首爲才調集十卷其書盛行當世序曰余少博羣言常取得志雖秋

螢之照不遠而離蟲之見自佳古人云自聽之謂聰內視之謂明也又安可受爵於愚幽取譏於書府者哉暇日因閱李杜集元白詩其間大海混茫風流挺特遂探摭奧妙并諸賢達章句不可備錄各有編次或閒窗展卷或月樹行吟韻高而桂魄爭光詞麗而春色調美但貴自樂所好豈敢垂諸後昆今纂諸家歌詩共一千首每一百首成卷分之爲十目曰才調集庶幾來者不謂多言他代有人無嗤薄鑒云爾調元按殺選才調集末卷附以無名氏而筆有鬼工自成一家考之他本皆無應是已作而附入者如明楊升菴武侯祠詩自云正德戊寅予訪余方池編修見侯祠壁間有詩惜不知其名氏而本朝沈確士朱琰皆以爲非升菴不能作附入本人詩集今亦按此例姑附錄之且其詩實出于殺之選而殺反無傳歸之本人亦以不沒其善云

傷哉行

兔走烏飛不相見人事依稀速如電王母天桃一度開玉樓紅粉千回變車馳馬走咸陽道石家舊宅空
荒草秋雨無情不惜花芙蓉一一驚香倒勸君莫謾栽荆棘秦皇虛費驅山力英風一去更無言白骨沈
埋暮山碧

白雪歌

皇穹何處飛瓊屑散下人間作春雪五花馬踏白雲衢十香車碾瑤墀月蘇崑乳洞擁山家澗藤古栗盤
銀蛇寒郊複疊鋪柳絮古磧爛漫吹蘆花流泉不下孤汀咽斷臂老猿聲欲絕鳥啄冰潭玉鏡開風敲簷

溜水精折拂戶初疑粉蝶飛。看山又訝白鷗歸。孫康凍死讀書帷。火井不煖溫泉微。

四時詞

鳥足遲遲日宮裏。天門擊鼓龍蛇起。風師翦翠換枯條。青帝按藍染江水。蜂蝶續粉抱香蘂。錦鱗跳擲紅雲尾。繡衣白馬不歸來。雙成倚檻春心醉。

春

赤帝旗迎火雲起。南山石裂吳牛死。繡檻夜夜箔鰕鬚。象榻重重簾湘水。彤彤日腳燒冰井。古陌塵飛野煙靜。漢帝高堂汗若珠。班姬明月無停影。

夏

秋色驅秋下穹昊。梁間燕語辭巢蚤。古苔凝紫貼瑤階。露槿啼紅墮江草。越客羈魂挂長道。西風欲揭南山倒。粉娥恨骨不勝衣。映門楚碧蟬聲老。

秋

蒼茫枯磧陰雲滿。古木號空晝光短。雲擁三峯嶽色低。冰堅九曲河聲斷。浩汗霜風刮天地。溫泉水井無生意。澤國龍蛇凍不伸。南山瘦柏銷殘翠。

冬

秦家行

曄曄飛光照天地。九天瓦裂屯冤氣。鬼哭聲聲怨趙高。宮花滴盡扶蘇淚。禍起蕭牆不知戢。羽書催築長城急。劍上忠臣血未乾。沛公已向函關入。

小蘇家

雙月謳謳帳秋碧。細風斜掩神仙宅。麥門冬長馬鬣青。茱萸葉綻蠅頭赤。流蘇斗帳懸高壁。綵鳳盤龍繳

香額。堂內月娥橫。翦波倚門腸。斷鰕鬚隔。

春

襲襲東風吹水國。金鴉影煖南山北。蒲抽小劍。割湘波。柳拂長眉舞春色。白銅堤下煙蒼蒼。林端細葉參差香。綠桑枝下見桃葉。回看青雲空斷腸。

雞頭

湖浪參差疊寒玉。水仙曉展鉢盤綠。淡黃根老栗皺圓。染青刺短金罍熟。紫羅小囊光緊蹙。一掬眞珠藏蜎腹。叢叢引鶯傍蓮洲。滿川恐作天雞哭。

紅蓼微

九天碎霞明澤國。造化功夫潛翦刻。淺碧眉長約細枝。深紅刺短鉤春色。晴日當樓曉香歇。錦帶盤空欲成結。謝豹聲催麥隴秋。春風吹落猩猩血。

斑竹簾

龍鱗滿牀波浪溼。血光點點湘娥泣。一片晴霞凍不飛。深沈盡訝蛟人立。百朵排花蜀纈明。珊瑚枕滑葛衣輕。閑窗獨臥曉不起。冷浸羈魂錦江裏。

聽琴

六律鏗鏘間宮徵。伶倫寫入梧桐尾。七條瘦玉叩寒星。萬派流泉哭纖指。空山兩腳隨雲起。古木燈青嘯

山鬼。田文墮淚曲未終。子規啼血哀猿死。

石榴

蟬嘯秋雲槐葉齊。石榴香老庭枝低。流霞色染紫罌粟。黃蠟紙苞紅瓠犀。玉刻冰壺含露溼。顰斑似帶湘娥泣。蕭娘初嫁嗜甘酸。嚼破水精千萬粒。

斑竹

濃綠疎莖遶湘水。春風抽出蛟龍尾。色抱霜花粉黛光。枝撐蜀錦紅霞起。交戛敲欹無俗聲。滿林風曳刀槍橫。般般苦雨洗不落。猶帶湘娥淚血腥。嫋娜梢頭掃秋月。影穿林下凝殘雪。我今慚愧子猷心。解愛此君名不滅。

三五七言詩

秋風清。秋月明。落葉聚還散。寒鴉棲復驚。相思相見知何日。此時此夜難爲情。

琵琶行

粉靨繡臆誰家女。香撥星星共春語。十盤嶺上走鸞鈴。十二峯頭弄雲雨。千悲萬恨四五弦。絃中甲馬聲駢闐。山僧撲破瑠璃鉢。壯士擊折珊瑚鞭。珊瑚鞭折聲交戛。玉盤傾瀉眞珠滑。海神驅趁夜濤回。江娥蹙蹙春冰裂。滿坐紅粧盡淚垂。望鄉之客不勝悲。曲終調絕忽飛去。洞庭月落孤雲歸。

天竺國胡僧水精念珠

天竺胡僧踏雲立。紅精素貫蛟人泣。細影疑隨爛火銷。圓光恐滴袈裟溼。夜梵西天千佛聲。指輪次第驅寒星。若非葉下滴秋露。則是井底圓春冰。淒清妙麗應難□。眼界真如意珠靜。碧蓮花下獨提攜。堅潔何如幻泡影。

留贈偃師主人

孤城漏未殘。徒侶拂征鞍。洛北去愁遠。淮南歸夢闌。曉燈迴壁暗。晴雪卷簾寒。更盡主人酒。出門行路難。

長門

悵望黃金屋。恩衰似越逃。花生針眼刺。月送翦腸刀。地近歡娛遠。天低雨露高。時看迴輦處。淚臉溼夭桃。

雜詩

鸞飛遠樹遊何處。鳳得新巢有去心。紅粉尙留香幕幕。碧雲初斷信沈沈。那堪點汚沈泥玉。猶□經營買笑金。從此山頭似人石。丈夫形狀淚痕深。折釵破鏡兩無緣。魚在深潭月在天。得意紫鸞辭舞鏡。墮松青鳥斷銜牋。金瓶永覆難收水。玉軫長拋不續弦。若到蘼蕪山下過。空將狂淚滴黃泉。

經漢武泉

芙蓉池苑起清秋。漢武泉聲落御溝。他日江山映蓬鬢。二年楊柳別漁舟。竹閒駐馬題詩去。物外何人識醉遊。盡把歸心付紅葉。晚來隨水向東流。

客有新豐館題怨別之詞因詰傳吏盡得其實偶作四韻嘲之

春風白馬紫絲韁。正值蠶眠未採桑。五夜有心隨暮雨。百年無節待秋霜。重尋繡帶朱藤合。更認羅裙碧草長。爲報西游減離恨。阮郎纔去嫁劉郎。

遊朱坡故少保杜公林亭

杜陵池館洛城東。孤島迴汀路不窮。高岫乍疑三峽近。遠波初似五湖通。梧桐葉暗蕭蕭雨。菱荇花香澹澹風。還有昔時巢燕在。飛來飛去畫堂空。

驪山感懷

武帝尋仙駕海遊。禁門高閉水空流。深宮帶日年年色。翠柏凝煙夜夜愁。鸞鳳影沈歸萬古。歌鐘聲斷夢千秋。晚來惆悵無人會。雲雨能飛傍玉樓。

長信宮

細草侵階亂碧鮮。宮門深鎖綠楊天。珠簾欲捲攬秋水。羅幌微開動冷煙。風引漏聲過枕上。月遷花影到窗前。獨挑殘焰魂堪斷。卻恨青蛾誤少年。

宴李家宅

畫屏深掩瑞雲光。羅綺花飛白玉堂。銀榼酒傾魚尾倒。金爐灰滿鴨心香。輕搖綠水青蛾飲。亂觸紅絲皓腕狂。今日恩榮許同聽。不辭沈醉一千觴。

聽唱鷓鴣

金谷歌傳第一流。鷓鴣清怨碧雲愁。夜來省得曾聞處。萬里月明湘水流。

雜詩

近寒食雨草萋萋。著麥苗風柳映堤。早是有家歸未得。杜鵑休向耳邊啼。
春光冉冉歸何處。更向樽前把一杯。盡是問花花不語。爲誰零落爲誰開。
水紋珍簾思悠悠。千里佳期一夕休。從此無心愛良夜。任他明月下西樓。
數日相隨兩不忘。郎心如妾妾如郎。出門便是東西路。把取紅牋各斷腸。
無定河邊暮角聲。赫連臺畔旅人情。函關歸路千餘里。一夕秋風白髮生。
花落長川草色青。暮山重疊雨冥冥。逢春漸覺飄蓬苦。今日分飛一涕零。
洛陽才子隣簫恨。湘水佳人錦瑟愁。今昔兩成惆悵事。臨邛春盡暮江流。
浙江輕浪泛悠悠。望海樓吹望海愁。莫怪鄉心隨魄斷。十年爲客在他州。

薛映

映字景暘。父允中。仕孟蜀。爲都官郎中。映自蜀亡後。隨父歸宋。舉進士。歷制誥。拜禮部尙書。

皇朝

類苑。映有送人之鄂州云。黃鵠

晨霞傍樓起。頭陀秋草繞碑荒。

曲水亭

臺盤疏石渠。激流環四面。夏屋有餘清。羽觴隨意轉。賓告醉言歸。主稱情未倦。雖非禊飲辰。豈謝蘭亭讌。

清風

爽氣乘秋至。涼飈蕩暑初。泠泠含遠韻。摵摵動輕裾。翠幙波無際。修篁韻有餘。潛驚塞草綠。乍拂井桐疎。素髮悲郎將。霜紈感婕妤。牕光流熠燿。簾影動蟾蜍。塵襲青絲騎。香飄紺轡車。故宮經馭娑。別館度儲胥。薄暮來金埒。凌晨上玉除。寧同起窮巷。賸欲賦愁予。

七夕

月放冷輪傍絳河。相期寶婺夜經過。姮娥不惜宮中桂。乞與天香分外多。碧天如水月如鉤。金露盤高玉殿秋。青鳥潛來報消息。一時西望九天虬。漢殿初呈楚舞時。月臺風榭鎮相隨。如何牛女佳期夕。又待鸞輿百子池。月露庭中錦繡筵。神光五色一何鮮。世間工巧如求得。四至鄉曹亦偶然。銀河耿耿露漙漙。綵鏤金釵玉佩環。天媛貪忙爲靈匹。幾時留巧與人間。

羅處約

處約字思繩。華陽人。父濟。仕蜀。後隨父歸宋。登第。仕終荆南路巡撫。

題太湖

三萬六千頃。湖侵海內田。逢山方得地。見月始知天。南國吞將盡。東溟勢欲連。何當洒爲雨。無處不豐年。

暢甫

甫後蜀時人

偶宴西蜀摩訶池

珍木鬱清池。風荷左右披。淺觴寧及醉。慢舸不知移。蔭林簾光冷。照流簪影欹。胡爲獨羈者。雪涕向漣漪。

許岷

岷蜀人

春曉曲

小庭日晚花零落。倚戶無聊妝臉薄。寶箏金鴨任生塵。繡畫工夫全放卻。有時覩著同心結。萬恨千愁無處說。當初不合儘饒伊。贏得如今長恨別。江南日暖芭蕉展。美人折得親裁翦。書成小簡寄情人。臨行更把輕輕撚。其中撚破相思字。卻恐郎疑蹤不似。若還猜妾倩人書。誤了平生多少事。

